





國朝文錄



22.515  
2048  
330




國朝文錄卷之七十二

賦類一

避地賦

黃宗羲

嗟我生之不辰兮逢家難於髫年  
 蘭芽之方茁兮霜雪從而  
 萎焉覆巢無完卵兮羌變姓於備保之間  
 幸先皇之御厯兮  
 大憝授首而鯨鯢之維時哭祭於闕下  
 兮醢奸骨以為犧先  
 皇登萬歲山而見之兮曰此忠死之孤兒也  
 雖紅日之照融  
 兮實魑魅之繁徒宦奄人而歸來兮孰不注東以僕姑烏聲  
 慘為車載板兮獸幻而為山都  
 兮反首芟舍兮念門戶之榛  
 蕪敢藝苑之春華兮收儒林之秋實  
 竊自比於管樂兮甯寒  
 簞乎蓬草夫名教之利刃兮固不便乎腐朽者之風逸  
 遂狷  
 狷詈為黨人兮禍復叢夫俊及彼兩京之顛覆兮曾不償孔



壬之恩讎我亦何罪何辜兮竊獨罹此橫流朝不坐宴不與  
兮私天下爲一家之憂榜朝堂而名捕兮圍門閭以戈矛待  
變熊蹯之熟兮寄命日影之留令無伏牀之泣兮友鮮復壁  
之收而乃避地於■兮觀日月之出沒經亂礁之窄粿兮  
想文山之竭蹶草木無所附麗兮但見饑鷹千羣之倏忽泊  
牡蠣之灘頭兮昔光堯於是乎至止數百年若旦暮兮誠流  
涕而不能已彼琴墮有還時兮今庶幾其復爾儼佛像於  
田兮遙千里而見之歷以中土之耳目兮祇鬼瑣而自疑鳧  
雁唼呷於鴻波兮島嶼之逶迤也熠燿明滅於紅窓兮星宿  
之推移也何馬蘭之弱草兮數十尺而扶疎行者往來其下  
兮每墮蕊之紛如瑞香亦五色兮與茶蘼而間諸凡島中之  
花鳥兮視人世而竟殊當夫百妖露天水同羣魚飛霧海市

當空帆俄頃而千里兮浪百仞而萬重縱一瀉之所如兮何

天地之不通越長岐與薩師瑪兮乃■夫■方銷兵而

忘戰兮粉飾乎隆平招商人以書船兮七錄韡於東京金石

古奇器兮比戶能辨其真贗華堂隔以綾幔兮月夜而齊鳴

乎箏瑟笙管予既惡其侈怵兮日者亦言帝殺夫青龍帝甲乙

青龍不可東行見墨子返予旆而西行兮胡爲乎■中而那避地於萬

山兮目視夫霄漢絕村落之煙火兮支土鏗於巖畔接十尋

之瀑布兮使受役於城且查梨瑣碎於秋林兮丹台嫵媚於

春澗與猿鳥而爭食兮偕樵蘇而相亂當夫寒食之時青松

散粉兮黃霧彌天杜鵑環岡兮紅霞匝地復有苦鳥鳴夜兮

林花莫不爲之憔悴處處哭聲朝朝喪柩抱膝而歌蒿里兮

墓林紙錢又乘飈而突戾嚴霜倒飛白髮孤燈不轉水樂但

聞鳥更將放筆而就寢兮開戶視夫中星斯時高岡之鹿下  
兮似老人且歎而且行旋繼之以猛虎兮風颭颭而屋瓦不  
甯習既久而不怪兮反有以助予之淒清而其雪合空山兮  
黃菊無苗而梅花有骨木客之跡無數兮樵人之境皆多誰  
謂莫往莫來兮亦有麋鹿之糖揆甘露降於寒松兮映初日  
之明熒茲馨烈之鬯達兮豈等級於醪醕限之以一坦兮疑  
至和於中庭亦有高人訪道至我廬邊古松流水算子鏗然  
悲屠龍之技兮僅世外之可傳蓋將埋名與草腐兮不虞爲  
野火之所妒以淵明之苦節兮天亦不憐其遲暮陶有遇况  
余之瑣瑣兮又焉能免夫孤露悲藥圃之就荒兮聽流水之  
侵路彷彿齋之易卦兮聊避地於市廛求昔時之屠狗兮遊  
酒人以亡年釋亡命之疑兮因避地於城郭守不見諸侯之

介兮齊咎譽之寂寞最此二十年兮無年不避避不一地念  
遷播之未定兮老冉冉其已至於是返故居捷六枳蓬蒿滿  
琴書肆苟歌哭之有常兮豈怨風雨之不蔽尋松陽湖之蹟  
兮按黃竹浦之記放翁稱夫蜀山兮九靈發其藍水二蘭絕  
江可望兮雙瀑舉足可企何墜簡之紛如今畱久湮之秘圈  
鷄牧豕其間兮不辭爲鄉里之所鄙詎料龍蛇起陸兮百毒  
一時而匯蚍蜉直欲撼大樹兮蜂蠆亦結而成隊僕區之法  
亡兮桑梓滌而無類末十年而又避地兮奉老母而竄於海  
隅累故書之千篋兮歎家具之一車襁女孫之三孩兮因世  
亂而憐渠一室分爲庖漏井臼兮盈丈而共鷄犬圖書談文  
正之遺事兮猶彷彿乎牛屯九亭石屋之延連兮昔汝湖之  
所園也羌獨不得際於斯時兮甯功名之足論遊東山之古

寺兮悵亡宋之哭聲衰亡邑之壯執歷千載而不散兮悲天  
運之復丁東觀兮會中流而擊楫挽墜日於虞淵兮恨  
此志之未捷雖同舟之已盡分而老兵退卒或留於灰劫相  
與指點殘陽之下兮無異尋乎夢中之蝶蓋聞承平之父老  
兮終身不見夫兵革獨喪亂之於予兮前未往而後復迫疲  
曳而不免避地兮尙遑遑其何適亂曰採野葛以爲糧飲之  
以鵠血兮結蓼花以爲佩美人復貽予以苦蘗兮彼桃李之  
豔陽阻風波而莫適兮苟前修之不爽又何庸厭射兮


獲麟賦

黃宗羲

康熙己巳斗柄東指麟見餘姚烏山胡氏牛之將產神光照  
里狼項馬足麕身牛尾遍體肉鱗間以金紫口如噴血聲函  
宮徵其文采之陸離豈馬牛虎鹿之可擬唯其爲天下所不

恆有雖婦人小子亦知其爲是謂之祥者曰歲星所散萬人  
沾壽哲聖鳴庭必明王在宥玉書墜地而至聖稽首其至也  
因時故出也不偶謂之不祥者曰鉏商一獲而周室衰孝武  
一獲而漢祚微元和章和凡三年而五十一見章帝何德以  
堪之安帝延光亦且三見孝獻一年之間十見於京師若麟  
十六石虎列之庭輝晉唐以降無代無有而孟蜀之邦乃至  
多於狐狸昌黎有言謂之不祥也亦宜予曰夫窮理者必原  
其始在物者必有其因深山大澤龍蛇是屯風雨晦明下與  
物親馮馬龍駒馮牛麒麟是皆龍種故曾出乎見聞惟茲烏  
山當海之濱春郊風暖陌上草薰或降或飲溼耳千羣遇靈  
物之蜿蜒覺和氣之網緼逮其生也張煙霧於海際耀光景  
於良辰世方以爲怪實不異馬牛虎鹿之胎娠麟見之明年

蛟蜃之出以千計益可以驗龍之所臻或者不推物理之自然而唯陳言之是循則祥不祥之辯徒爲警說之紛紜也



擬璿璣玉衡賦 有序

梅文鼎

易言治麻策數當期典重授時中星紀歲蓋七政璿璣之制類先天卦畫之圖原道必本乎天儒者根宗之學制器以尙其象帝王欽若之心理至難言以象顯之則理盡意所未悉以器示之則意明故揚雄覃思澤天用成元草平子精探靈憲聿闡元樞覆矩仰規一行以之衍策天根月窟堯夫於焉弄丸此聖學之攸先匪術家之私尙也况姬公之法受於商高而神禹之疇肇諸河洛平成永賴貫資句股圖方寸藝碩膚爰有南車記里高深廣遠寸矩以御幾何律度量衡萬事斯爲根本既圓頂而方趾敢忘高而負深苟俯察而仰觀必徵理而稽數家傳大易竊慕韋編世濟清甯恭逢鉅製竭歐邏之巧力紹蒲坂之芳型洵心理之胥同中西昭合亶後來

之居上今古無雙雖株守山陬遲覩靈臺之美而心儀法象  
遙忻神器之成僭擬短章臆窺鴻典無裨采聽聊當衢歌云  
爾

至哉渾儀之為器也體天地之撰類經緯之情微顯闡幽窮  
高極深殆更僕莫殫其蘊累牘難悉其能者矣粵自道生宇  
宙肇為大圓健運無息東西斡旋七政錯行宿離糾紛交光  
羅絡終始相嬗雖有離朱孰闕其端聖喆挺生仰俯觀營積  
候成悟蹟探隱索諭六虛之曠邈詎目營兮可獲迺范金兮  
為儀縱若衡兮八尺麻以之治兮象以之覈堯命羲和四隅  
分宅制閏成歲釐工熙績匪有器以御之孰所憑而推策虞  
帝受之機衡以設敬天勤民兩聖一轍嗣三統兮迭更茲重  
器兮罔衰陳東序兮天球羌大訓兮為列河之圖兮莫先况

琬琰與宏璧羸秦力政罔畏天常遷周九鼎焚燬舊章球圖  
湮沒莫知其鄉麻紀乖次伏陰愆陽及夫漢造太初渾天初  
置唯意匠兮經營未詳徵兮昔制會黃赤兮未分別歲差兮  
能治歷唐逾宋代有討論小異大同踵事而增說存掌故約  
略可陳外周六合子午為經卯酉交加日月之門三輪八觚  
象地者衡是立郭郭以挈三辰黃倚赤而相結剖二至與二  
分判發斂兮南北距紫極兮為言小環四游又居其內左右  
周闕兩簫更代低昂斜側折旋唯意儀三重兮共樞直推步  
兮精義亦有銅球實惟渾象列星綴離三家殊狀或附益之  
兩曜類蟻行兮磨上遲速行兮一機或水轉兮磨盪非不研  
精覃思窮神盡智象重大兮易膠每機關兮弗利儀重環兮  
掩映頗未宜乎闕視加以代異人湮乍成旋廢作之也何難


壞之也何易若乃元祖初服廣徵碩儒有美魯齋王郭之徒  
既作授時備器與書高表四丈承以景符簡儀候極離立扶  
疎二綫代管分秒乘除度百刻兮天腹旋立運兮四虛闕几  
兮測日蓮花兮挈壺正上方有案兮定南北懸正座兮九服之  
須仰正儀兮虛而似釜度斜絡兮南極攸居可謂酌古準  
今洵美且都者矣歷年未百有明膺命雖大統兮殊稱實授  
時兮爲政屬作都兮石城旋京邑兮北定既觀臺兮屢遷地  
更寘兮乖應豈儀器兮多迂抑疇人兮弗敬轉測之或未嫻  
兮址漸傾兮蔑正甯不善厥初兮歲薦更兮滋釁經生既非  
所習兮又申之以厲禁專科不相通兮有憤悱兮誰問遂使  
靈臺徒爲文具交食或乖誰知其故帝謂兮草澤疇明理兮  
習數爾乃理難終隱道有必開天相其衷西人竭來如禮失

兮求堊似問郊兮識官此珍秘兮勿洩彼菽帛兮非難於是  
吳淞太史仁和水部夜譚晨鈔心追手步亦得請而開局集  
歐邏與儒素擷西土兮精英入中算兮鑪鑄屢清臺兮雜候  
良占測兮可据怵巧拙兮相形新術精兮羣妒慨萬里兮作  
賓兼十年兮發覆麻成分弗用良書兮徒著何人事兮多違  
或蒼穹兮有待唯我 盛朝度越千代正朔初頒適逢斯會  
唯欽若以爲懷奚畛域乎中外洞新法之密合命遵行爲定  
制晒豎儒兮固陋謬執古兮非兮若盲不杖兮聾別竿笙斯  
術之無弊兮經指摘兮益明乃詔太史乃咨禮臣謂新麻兮  
允臧顧儀器兮未成式采銅兮名山鳩哲匠兮上京備製兮  
六儀各錫兮嘉名赤道兮法動天之西轉黃道兮儷七曜之  
東征古二道爲一器兮景交羅而莫分兮別其用兮法以簡

而倍精黃既麗赤而左旋兮復自轉而右奔緯度之各異兮亦異其經黃自有極以運兮誠振古之未聞游表所指兮太陽之心時時可驗節候兮若影於鏡地平之儀辨方正位轉綫參直三光所至出沒之度漸升之意秒忽微茫具可別識象限平轉兮測高與庠割圓入綫兮於是焉施合四爲一兮周天在茲度惟九十兮厥數已全紀限六十兮於以參焉正反隅角兮靡幽弗宜用稽距度兮兩星之間弧三角之法兮推其所然五者相資多人分測片晷之餘各盡目力假變行之迅速無須臾之或失別有渾球全賦星躔循皇之極甚昇珠聯列曜遠近南北八度小輪之限準斯無摺亦依赤極出地有恆或正升兮斜降或正降兮斜升晰伏見之先後諸里差之所因黃緯之列兮百世無改宮分迤差兮恆星東匯以

度計年兮六十六載下設旋輪兮水激自動刻漏罔僭兮機發於踵爰有高弧繫之天頂地平經緯茲焉互審或象限兮平觀或紀限兮斜距或黃赤儀之所窺絜之珠而參遇爛若軒轅之寶鏡兮縮圓形而周布衆儀得其散兮球徵其聚正求兮反映宛轉兮回互測量有書兮或不能句摩娑斯器兮曠如揭霧更旋宮兮十二隨道里兮攸殊際地之極南北兮以爲之極子午及平環兮以限四隅隅各三宮兮東方爲初次第右環兮大權以區三合六台之照兮凶吉分途惟斯球而可睹兮考步算之密疎致用萬端未克枚舉洵天府之奇珍永作則乎來者若其鎔金有法棄滓取精磨礪砥礪光輝熒熒旋之中規直之中繩擘劃勻細度萬其分實儀衡重測重求心力相扶兮罔偏積歲年兮弗傾跌交之以銅龍兮或

海獸以相承爲水準與螺柱兮常消息焉取平天矯兮騰蹕  
攫拏兮猗猗詎美觀兮一時永奠定兮千春乃至崇臺百步  
迴出闐闐周以儲胥纖埃攸避上列六臺方圓式異相依兮  
交讓旋觀兮罔闕旋窺筒之奇巧晒千里兮如對晝候兮日  
面之星夜占兮句已之態折照浮光兮氣水水氣清濛厚薄  
兮地心相配交食淺深兮起虧進退地景厚薄兮青綠明昧  
視差有多少兮命天九重月有弦望兮太白攸司抱日爲輪  
兮互入相容超西法之舊兮信天能之弗窮登斯臺也軒豁  
洞達耳目開通揮斥兮八極廣攬兮無終意氣兮飛揚凌虛  
兮御風習其器也陸離瀟灑繽紛磊砢燦爛兮朝霞孔明兮  
朱火照耀兮焜煌周流兮軒翥慢對越兮於穆遊吾心兮太  
古帝載之虛無兮陟降其所垓埏之遼絕兮斂之一黍非重  
黎之誕降兮曷其臻乎要眇邈邈之不作兮疇則探斯奧  
窆伊崇效而卑法兮協至德於大灝定百代之猶豫兮踵危  
微於帝道畢遠臣之精思兮備前王之所少璿璣玉衡之不  
傳兮乃今而獲聖人之大寶亂曰巍巍穹窿帝所則兮父乾  
母坤不敢不及兮寫以良金如塑像兮朝斯夕斯期勿忘兮  
子之於父視無形兮瞻茲肖貌曷敢以甯兮兢兢業業承天  
休兮奉若不違升大猷兮祈天永命從茲始兮億萬斯年昊  
天其子兮



粵江賦

施閏章

壬辰暮春奉使西粵將下灘水汎蒼梧時嶺南甫定所在榛  
莽心懸萬里勢異三江行而不息遂浮漲海爰抒情託翰以  
粵江命篇事不期詳聊書卽日辭不競侈略紀荒隅若曰揚  
元虛之清波鼓景純之洪沫此則平子爲之絕倒士龍需以  
覆瓿云爾


頓余轡兮桂嶺鼓余柁兮離江維此流之澎湃實分源於沅  
湘鑿靈渠而曲注匯猗洞以沆瀣豈天地之鍾崇抑河伯之  
流殃南連交趾北控漢陽西毗巫峽東浴扶桑神禹望淵而  
卻步桑欽輟翰而徬徨險隘劣於容舫森激騰於飛矢疊竿  
腸以爲崖紛犬牙之錯峙橫磯截而若斷積峽閉而還啟瞻  
前後其不屬洵眩目而駭耳於時青陽弭節朱明發塗瘴雲

釀厲炎風煽愁入舟若甕披締勝裘雖漣漪而樂飢曾不可  
以久畱聊翹首以遐矚託乘槎以寫憂若夫夾岸層崑詭形  
不若或上方而下圓或踵銳而頂縮此乍騰而旋倚彼奮飛  
而中落爲杵臼之參差爲刀劍之峯嶺渺煙雲之旖旎森虎  
豹之相搏雲竇宵其洪深洞門闕其寥廓亶魑魅之窟宇江  
妃之所磅礴若夫石壁百仞的爍玲瓏蟲鳥繪繡風雨磨礱  
皎潔則玉屏失素渥丹則晨霞奪紅盼盼若鬚眉之刻畫纍  
纍懸鐘鼓之肅雍俯墜而成飲猿仰躍而作飛熊日曜珊瑚  
之圃潭澄珠貝之宮湛縹青與結綠與雲水相菁葱良綺麗  
而難忘亦愀愴而動容爾乃急激危灘星羅電逐倍瘼藜之  
糾蔓驅地軸以反覆龍首乍昂鼇背潛伏雷劈聲訇黃牛吼  
瀑雷劈黃牛貫軸轆於一綫汙盤渦於千曲石硠硠而相壓

水噉噉而自哭蝮蛇噴氣以成霧鰐魚張口以伺肉苟失路  
於秋毫將永逝而不復其草木則鬱金馥烈冶葛蔓延菓鏤  
人面樹號鉤緣地羅錦燦斷續藤牽楓人椰子筍竹木棉桂  
緣岡以挺翠榕抱石以連蜷罔枕柳於密谷塞蒟萁於崇山  
草吉利以祛毒竹輪困而爲船上林絕種本草遺編其鳥獸  
則豺狼疊跡咒穴交衢林潛犀象原卧麋鹿猩猩躑躅萬鳥  
笑呼糖牛舐舌飛虎餐膚錦雞孔雀倒掛提壺憐彩翰之鷄  
鷄憎南飛之鷓鴣彼吉了與鸚鵡豈言語之與人殊何託體  
於嶺表寄翩翮之微軀羨羽族之有口哀人生之鬱紆爾其  
乘迅流之逸駭命蘭楫之貽蕩語未終而岸移瞬方迎而境  
往駕飛廉而奔駃騠虬螭而懍恍至於綠磯升舫濡裳引纜  
瀨急篙摧裝傾水濺舟人屈蠖而叫號若哀鴻之悲彈方杲

杲其日出鬱炎炎以沸湯鼃負沙以出曝蛟跳波而驚翔忽  
淫淫而滂沛雲慘慘以書昏木椽椽兮肌粟水澌澌兮山奔  
迷帆檣其失影悵天地之何存歎陰霽之回互愆四序之寒  
暄訪溪蠻兮島夷問江亭兮水驛敗瓦頽碑梯崩徑坼或卉  
服而鳥言亦巢山而栖石渺乎若行蟻之上枯黎悄兮若蝸  
牛之廬絕壁於是有漢將南征戈船竹舸馮夷出鬪蛟人並  
坐馬飲流而駭毒士解甲而就裸馳羽檄而逡巡仰跼薦之  
前墮亦有宦游使者持節浮槎感夢山靈隕泪江花悼然犀  
之短照耿幽咽於哀笳霓旌折於窮島鷁首沈於漲沙若乃  
魚鹽市販之徒珍怪遠方之客採奇方於儋崖剖明珠於海  
舶巴姑笑而嬋媛獠戶聞而踵索忽抽刃以剽殺各鳥散而  
狼籍至於遷客羈人幽囚嫠婦銜悲嶺嶠寄愁林藪影畏含

沙之蟲心繫啼猿之樹朝露泣其寥蕭夕月藹其幽素然青  
磷於宿莽弔冤魂之麤聚或風噪而雨嘯涕闌干以相顧撫  
單影之不雙嗟遇物之非故邈中土之人兮夫何爲乎此路  
忽收淚以自疚兮將憔悴兮告誰尼父發波臣之歎張騫犯  
織女之機三閭吞恨於魚腹伍胥流憤於鷓夷彼聖賢不惴  
乎死生復何有於險巖龍負舟而按劍蛟爭壁而不迷審至  
人之髣髴悟哀樂之是非齊四海於勺水指十洲以爲期



述歸賦 有序

徐元文

庚午季夏余被搆誣禍幾不測辱 當宁顧護之恩放還田  
里僦舟而行每所游歷輒慨然有懷古之思又中遭關梁淹  
厄乃有發蹤以逞毒螫不可不誌用諗後之人若夫息聲晦  
迹無所弗避讓固中之所甘而淒煥變情交路異態則無足  
有云也將抵里門聞訶伺於吾邑者絡繹未已雖目望家山  
載奔衡宇而灼然懷憂無鄉園之適可謂困矣夫叔皮之北  
曹惠之東皆紀其征行撫已論古如是而已無餘感也至於  
平子歸田安仁閒居敘弋釣之娛誇竹果之勝又非所敢望  
也無以命篇命之曰述歸云爾

余邁世之嶽嶮兮抱貞信而蒙嫉謂夷貪而惠鄙兮眩蒼素  
而爲一黨膠合以根盤兮勢赫烈而溢溢彼詭變之無方兮

詎常慮之可必非薄弱之能抗兮眾瞠視而莫恤惟吾 后  
之聖仁兮終疇昔之眷施保微軀許旋還兮無巢傾而卵墮  
感邱山之至恩兮恨塵露之夙虧趨九閭以謁辭兮疇實爲  
余通之出閭闔而掩涕兮繁 黼宸之戀思去畿輦之閔麗  
兮卽川路之紆回惟潞水之演漾兮亦衆流之所匯考車箱  
之舊渠兮固兼資夫漑漑惟鄭白之不作兮致田功之多廢  
往代常興繕兮遺貴近而輒闕慨民利之難興兮徂因循而  
莫悔擊汰滌陰之河兮緬憶岳而慨惜乍得政而憤發兮遠  
見扼於曹石二姑交流以趨海兮經疏導於伯禹紛千屢與  
百隊兮鬱天津之奧府信聚人之以財兮致殷於鹽鹽勃海  
之雄州兮故燕齊之分域漢武東巡而頓蹕兮峨高臺之翼  
翼樓船浮而屈王險兮僕失衆而弗克文師還自蓋牟兮亦

紀功於臺側處黃屋而非安兮亮雄心之難抑歷東光而攀  
弔兮伊頽當之故封嘉棄釁而徙義兮冠討叛之軍鋒綿通  
侯於累葉兮每旣替而復庸南陽奮於茲土兮與戮豎而黜  
周舍產祿之凶慝兮棄劉薛之英謀崇虛爵而釋政兮功反  
蒼而爲尤除惡不務去草兮固曩賢之所憂祐攀鱗之最先  
兮徒鬲津而疏爵抗儒術以臨戎兮志安定而不虐士雖怨  
而德厚兮茲邱墳之永託進余棹於武城兮迺趙勝之食邑  
詭相士而失之遂兮竄遁逃之用集時稱豪而實蠹兮憤戰  
世之薄習祀言氏於河濱兮非絃歌之所及彼志乘之多舛  
兮詎獨遺乎滋惑清淵始置牖兮時閉啟以利漕期揚帆以  
前濟兮忽關吏之遮邀彼不諒琴書之蕭瑟兮專附勢而媚  
豪舌雖做顧聽藐兮惟驕暴而縱饕雨淫淫其索夕兮風颺

颺以連朝獨淹頓以悒鬱兮如罟網之弗可逃不遵陸以問  
津兮良蒙謬之由招過濟北之聊攝兮惟有漢之東郡彼魯  
連之約矢兮城見屠而將償執高義乃導降兮洵墜言而不  
可訓子贛昔守茲邦兮河盛溢而隄削植立甘以身填兮歎  
波回而水却勇節猶感神明兮世齟齬而怪愕肅皇之行幸  
兮却郡朝而親師誦敷講而吏畢會兮修子弟之舊儀雖朝  
謁猶在所後兮孰重道而能斯潛渠興自有元兮更三變而  
會通明填淤於初載兮文遷蹕乎故封咨汝禮往營度兮循  
故道而偁功念川涸常可越兮契異叟而達聰遏汶從西南  
流兮入驚河而成深竟同源以分注兮南北濟而不窮舳舻  
迫今賴之利涉兮允廟祀其攸崇均黃髮而納忠兮葆恬泊  
之夙秉荷殊錫還任城兮鳴玉鑿而來幸被腆祿俾沒齒兮


踰千載而輝炳李與杜曾游涉兮緬風流乎詠鷓樓堯業夫  
會城兮池激灑於平塘在當世旣遭屯而矢志兮復羣兒之  
謗傷豈知夫文章之屬穹壤兮焯萬丈而攄光行踰沛爰西  
睇兮昔魯狩之所卽麟非時而見野兮興夫子之慨息彼至  
聖猶道窮兮履筆削而自力貽褒譏使亂賊懼兮亘萬古以  
爲則感斯麟乃有作兮謂非祥而不得望嶧峰嗤秦巡兮始  
立石而頌諛驕與佞日相尋兮羸不祀也忽諸河流之湍悍  
兮自往世而易潰勢每徒乃益南兮沸不甯夫厚地惟引漕  
之攸繫兮泊與古而殊異昭陽之溢爰鑿新渠兮歷夏邨而  
避夫洪流畏呂梁之懸水兮開滕嶧之泐溝衡因跡於往盛  
兮龍踵策於故剡孰建事而可予智兮躋前人之協謀曩奔  
決之屢告兮注淮泗而爲壑閭爲河而皓旰兮哀羣生之靡


託伐柳爲楫不遺枿兮薪蕭條乎叢薄卒聲募而實役兮腹  
 不飽而程作暑喘汗於熾燎兮寒瘕墮於洛澤責涸土以爲  
 田兮重編氓之飄泊入明廷再聚訟兮卒大獄之繁興羣  
 思逞以泄憤兮賴聖皇之哀矜議紛呶而未有定兮勞  
 萬乘以南征河伯感而效靈兮迄安瀾而地平中河之宛宛  
 兮蓋倉遽而卒工幸回險且洩流兮詎暴過而蔽功河與淮  
 各爲瀆兮馴始創而匯并強束弱欲敵彊兮終泝水之溯騰  
 鍾巨患於楚州兮衆猶準以爲式程薄旦夕之苟幸兮敢雷  
 同而漫稱羽故里實下相兮起隴畝而雷動謂王業可以力  
 征兮何國社之能鞏志萬人而是敵兮亮匹夫之爲勇位不  
 終而古未有兮煩良史之追奉過韓王之鄉井兮偉國士之  
 無雙奮奇略竟覆楚兮開漢業之焯焯通涉說而早見絕兮

詎倚夫陽夏之猖狂納上變以詐屠兮雖帝念其猶愧傷雷  
 遺廟枕清淮兮非越布之可望汲直之嚴憚兮曾社稷臣而  
 見取既中棄而復收兮何又麾而出守豈一郡重於朝闈兮  
 疆臨軒而予綬惟伉伉之不容兮竟終老乎淮右廣陵之隩  
 區兮帶重江而聯四會萃繁華與芳麗兮每由盛而致替滯  
 恣睢於白首兮誕萬沒而無避揚湛溺以不返兮卒身隕而  
 業墜蓋汰侈足爲禍兮固自古之所志大江之湯湯兮望漲  
 海而奔流城周密迺如壘兮峰孤浦以若浮山川閱而無改  
 兮人事遷而不留昔安石之臨郡兮膺北固以儲胥秣陵其  
 唇齒兮屹重鎮於南徐楚僞之妄干兮下邳合其義徒粹誅  
 修以徇衆兮袒戮宏而應符暢大義在俄頃兮亦形便之所  
 圖晉陵子札之封壤兮峻退讓之姤節世作色於豆羹兮邈

不念夫曩哲吾吳之清嘉兮繫秦伯之舊邦游擅科於聖門  
 兮文學衍而流長山鬱雲以含潤兮波漾碧而搖光故園臨  
 於谷水兮實婉戀之崑陽老樹廓以布陰兮雜果羅而成行  
 審陳力之不逮兮思投迹乎農桑恩綦厚而未忍兮遽矰繳  
 之為殃載我后之鴻施兮曰歸來於井邑彼吠者之信信  
 兮伺百輩而未息既焚次而羸角兮復困藟而寘棘魂斃斃  
 其焉依兮夜耿耿而待日家彌近而宜彌欣兮獨輾轉而心  
 惻感避地之遺誨兮將往之乎他域守貞素以俟命兮綜琴  
 書而自得冀日新而加厲兮奉曩修以為則亂曰好是正直  
 素所蓄兮中情信脩敢徇俗兮嶢嶢易缺聞之夙兮往蹇來  
 反念止足兮悄悄斯憂吝不飛兮我后之德俾旋歸兮邱  
 園匪甯畏禍機兮德或有鄰行擇棲兮含貞履潔外不侵兮

周孔圖書詠且吟兮省讐惕厲動自箴兮我思古人獲我心  
 兮





謁孔林賦

朱彝尊

粵以屠維作噩之年我來自東至於仙源斯時也壇杏花繁  
庭檜甲坼元和之犧象畢陳闕里之榛蕪盡闢既釋菜於廟  
堂旋探書於屋壁乃有百石卒吏導我周行牽車魯城之北  
縹馬洙水之陽卽大庭之遺庫循端木之故場驕孫祔兮居  
前聖子藏兮在左自黃玉之封緘闕幽宮而密鎖隕長鯨兮  
不驚懾祖龍兮遠禍除荆棘之叢生罕翔禽之飛墮雨露旣  
濡遲景東隅整衣裳之肅肅正顏色之愉愉展謁方終誕筭  
往蹟超白兔之深溝撫青羊之卧石爰有草也苞著其名守  
之以龜一本百莖我求其德洵圓且靈爰有木也題之以楷  
非柏非樅靡瘿靡虜歷千禩而長新貫四時而不改惟先師  
之遺澤道莫著乎六經配光華於日月若迭奏之琴箏降而

後儒各事采獲中文古文之書先天後天之易目鄭衛以淫  
邪誣春秋以深刻藐往哲之嘉謨恆末師之是則滔滔天下  
後死其悲安得起素王於泉壤操筆削而正之我思古人恥  
同汚俗或六聘而收身或三詔而逃祿或依李充之山或就  
張超之谷潛戶壁於服虔變姓名於梅福入源水兮栽桃隱  
丹霞兮種竹詎如此地桑海不遷可游可息有歌有弦耳不  
聞僧尼之魚板目不覩旗鼓之樓船樂土樂土速營一廛願  
爲林戶躬耕墓田庶幾近聖人之居讀聖人之書將不得爲  
聖人之徒也與

平蜀賦

潘耒

皇帝御宇十有八年冬 命奮威將軍臣進寶勇略將軍臣  
良棟率師討蜀寇密授方略分道進攻十九年正月癸卯進  
寶克保甯僞將軍王屏藩窮蹙自盡擒吳之茂以下二十餘  
人前三日庚子良棟自龍安進克成都僞巡撫張文德降蜀  
地大定了已露布至京宣捷午門外在廷之臣咸以 皇上  
廟算恢闔坐見萬里激厲將士建茲奇勳相與踴躍唱歎形  
之聲詩臣遭遇 殊恩載筆史館頌揚成功職不敢闕謹獻  
賦曰

溯皇王於前烈偉撻伐之鴻謨奸無鉅而弗剪兇無遠而弗  
鋤霆發聲於豐隆星耀芒於威弧鯨吞舟而就斲蛇搏象而  
見屠法春生與秋殺有霜落而露濡必武功之退暢乃文教

之誕敷惟我 皇之聖仁廓天地以爲量王道履以平平天  
門開其蕩蕩彼么麼之小醜敢盜兵而衡抗類射天以彎弓  
似逐日而投杖蛙處井以陸梁螳當車而倔強依嵐箚以爲  
巢憑崖谷以作障巖巖梁益實號金城國闢蠶叢山開五丁  
劔閣梯空以懸度棧道循經而上征天井盤旋而窈黑地網  
綿絡而縱橫水以虎牙赤甲爲咽喉陸以龍門鹿頭爲門戶  
挺一戈以當關非萬騎之能取遭天光之分耀有草竊以偷  
處曾六合之一家敢走險以旅拒雄虺九首苞蘖三芽傳烽  
巴閬築壘褻斜驚百城於風鶴變一軍爲蟲沙初屯蜂而聚  
蟻旋鬪鼠而戰蝸思明瘡於河陽少誠殲於淮表彼逆孽之  
遊魂若枯莖之待掃何醜類之睢盱尙橫距而肆爪倚嶂嶺  
之千重謂天險其可保 皇赫斯怒整我六師招搖爲戈參

伐爲旗審制勝之在將料奪險之用奇拔虎臣於行間建高  
牙而授之曰汝進寶龜貅如雲東趨閬中毀其重門曰汝良  
棟突騎風雨西走陰平抉其後戶分道交攻奇正相權或倚  
或角動於九天惟東軍之驍騰凌七盤而徑度奪朝天之巖  
險葭萌空而不戍分勁旅爲三行令異道而同赴摧堅陣於  
背城斬突稀而餘怒積甲齊乎錦屏投鞭斷乎江路迨禁旅  
之薄城斬門關而齊驚兕渠焚於窮猿逆黨禽於脫兔蓋纍  
纍籍籍鈐甲面縛者不知其數西師卷旆以橫邁據密樹之  
重關出間道以擣虛儼瓊裹而林攀爭白水之阨塞破鐵門  
之孱顏忽浮馬而渡江張赤幟於菁山朝耀兵乎江油夕嚴  
陣乎懸竹訝天兵之飛來俄攻心而潰腹開錦城之峩峩豎  
降幡之一幅收奇功於浹辰若風雷之迅速捷書並奏飛檄

交馳鋒不再淬矢不再披剗勁寇若振槁舉名都如拾遺  
天子乃升紫宸之殿讀露布於彤墀千官集乎闕下望  
天顏之怡怡莫不鼓舞讚頌曰盛哉乎武功振古未覩茲也  
惟此劍南代有反側塹山燒棧便同絕域若漢室之討公孫  
晉氏之斬李特宋主之擒譙縱唐宗之誅劉闢皆用堅攻取  
以順討逆風行電掃罪人斯得然猶水陸夾攻首尾並擊傷  
損將士窮竭兵力彌歲淹時僅而後克未有不頓一兵不折  
一戟駭若發機震若霹靂旬月之間廓清西極如今日者也  
天子將將大將將兵旣得龍驤復有營平師以和而後克功  
惟斷而乃成規萬里若指掌故無戰而有征夫蜀國者滇黔  
之維首也蜀平則破竹無前建瓴直走蒙詔亡魂貴筑不守  
將遂定邛夔略犍爲兼冉駝收沈黎簡巴渝之勁卒與彭濮

之銳師浮舟牂牁飲馬瀘溪峨嵋爲鐔點蒼作鏑置桀葉榆  
圍掩蒙樂伐銅鼓之碎旬驅金馬之騰趨血鑿齒以釁鋒膏  
猥偷以染鑊然後前歌後舞班師而還受成廟社薦功  
皇天包干戈以虎皮却走馬以糞田沛曠蕩之恩下復除之  
詔與萬姓相勞苦哀疲氓之無告撫摩癩瘡長養凋耗勸耕  
課桑興廉舉孝蒸斯人於太和羣詠仁而蹈道基隆平於萬  
年襲三五之休號豈不盛哉遂作頌曰天錫智勇爲君王  
兮神武不殺誅猖狂兮運籌決策自廟堂兮任屬賢將齊  
鷹揚兮天戈一揮除權槍兮遂清大憝克鬼方兮長御遠駕  
包八荒兮刊山表柱垂無疆兮

平滇賦

潘耒

粵稽皇王數典考墳紹業承統守文之君或英明而沈毅或

恭儉而寬仁休風駿烈厥亦有聞若夫彌綸造化整頓區宇  
經世以文戡亂以武除凶殘若風霆沛德澤如膏雨巍乎遼  
哉首出之聖書契以來曾不數觀惟 國家誕膺休命 列  
聖重光宅中圖大臨馭萬方 皇上克聖竄聰嗣纘歷服阜  
成兆民平章百揆威暢德敷義涵仁育煦之以春陽潤之以  
霖霖方銷兵以鑄鋤希還醇而反樸屬者五緯遺氛三辰餘  
沴國丁小厄天亡醜類乃有三藩之事以勤我 聖帝惟三  
藩者滇南爲魁次廣與閩一苞三葉駢幹連根實先朝之宿  
將亦勝國之逋臣諒豺聲而鷹眼非羈紲之能馴 先皇帝  
大度軼乎漢高深仁邁乎宋祖念其搏擊之勞昇以帷蓋之  
所高牙大纛作藩南土蓋將以威蠻制獠壯干城而扞疆圉  
何圖爵極而亢寵過斯驕擅士馬之雄富與土地之殷饒殺

生操於幕府除拜擬於 天朝聚宵小爲淵藪流金錢如波

潮無懸癰而不潰有厝火其必燒 皇上明燭未形智周無

象金鏡在懸太阿在掌與其滋蔓而難圖不若消萌於方長

與其後事而芟鋤無甯先時而滌蕩爾乃發 睿策啓 神

謨因乞休之陳請下撤還之 詔書俾移屯於遼海卽樂土

而安居將保全乎勳舊匪弓藏之可虞蠢爾滇渠敢行倡逆

忘奕葉之寵榮背 累朝之恩澤矜百戰之餘勇謂人寰其

無敵規豕突與鯨奔遂白頭而作賊裂背一呼其從如雲輶

弓毒弩十萬爲羣旣席卷夫湘江復虎踞乎夔門將北向而

爭利勢滔天與燎原閩廣之兇以次干紀毒虺雌雄長蛇首

尾其餘反者蝟毛而起西綿隴坻東絡海滋鄙延之郊荆襄


之鄙震聳者三方驛騷者萬里甚漢室之邊雄同唐家之安

史彼敦峻與景全何兇鋒之能擬惟皇神武不震不驚恭  
行天罰赫赫明明發雲臺之鎧仗整岐陽之旆旌丈人長子  
維城磐石之宗以爲將帥中黃虎賁射聲伏飛之士列乎屯  
營於是親畫成規密授方略旣攻心而伐謀亦擣虛而批郤  
堂堂聲罪之辭戢戢賞功之爵踞鞍而猛士色飛騰檄而兇  
徒膽落天子之兵無戰帝王之師萬全不逐一璧之利  
不陷一城之堅其守也靜於九地其攻也動於九天是使劇  
賊挫鋒梟雄失氣矢如雨而不得射戟如林而不得刺鬪騰  
躍而技窮虎咆哮而力弊賊衆有魚爛之形官軍成破竹之  
勢遂乃平乘巴陵橫掩洞庭滢浦之餘艫失水衡峰之草木  
皆兵逆臣賊子亡魂喪精血未膏於王斧身已殛乎天刑亦  
越閩關天兵飛度士女謳歌壺漿塞路叛臣面縛而來歸逋

寇倉皇而失據蜃咽氣而消亡鯨跳波而僵仆彼粵孽之兇  
狡信梟獍其何殊幽厥父以稱亂牙擇肉而恣睢天戈臨而  
糜爛何螳臂之當車嗟革面其已晚有延頸而就誅若乃狐  
鳴鳩嘯之羣寇鋌狼奔之隊尤來大槍之盜魁延岑彭寵之  
叛帥首鼠前却乍叛乍臣者以千百輩莫不脫距摧牙沙崩  
瓦壞枯尸疏屬之山傳首桃林之塞於是陰平夜走劍閣朝  
通索橋度馬藤峽懸弓黔蜀之地悉定水陸之師會攻徑盤  
江而擣脅蹂蒼山而挾胃高壘馮城長圍四築不頓一弦不  
亡一鏃嗟劉稹之駭癡與元濟之窮蹙曾飛走其無路空椎  
心而慟哭竟駢首以入函無遺種於兇族於是八方奠定六  
合無塵梯航窮乎日窟鞮譯盡乎天垠邊陲無鈴柝之警函  
夏皆耕桑之民橐弓脫劍一軌同文原夫三藩之設歷紀於

茲尾大不掉實繁披枝國勢爲之衡決民生爲之瘡痍而今而後快然毒去霍然病衰煙消霧剝天清日輝非大聖人之威德何以及斯惟幾也爲能周天下之慮惟斷也爲能成天下之務撤藩之議偉矣徂於苟安搖於浮言則莫能以果決難作而張皇釁成而姑息則莫能以速滅藩鎮之禍未有所底也 皇上以一人之智勇爲海內除大殘以八年之憂勤爲萬世貽永安雖唐帝之戰丹水軒皇之克阪泉夏后格有苗於兩階殷宗伐鬼方於三年絜功比德未知其後先猶且謝鴻名而不居推大美而不有彌謙沖以兢惕期保泰於永久肅乎敬器之或傾凜乎馬索之將朽哀烝人之疲勞念三星之在鬻遂乃發 德音沛 恩綸捐逋賦予貧民赦獄囚廣大仁優卹將士大賚臣鄰罷一切權宜之制與天下爲

更新大圭禮 天特性祭 廟望祀山川潔將標燎極尊養於 兩宮增推崇之顯號馳展省於 園陵薦成功以昭告然後申明象魏釐飭官常百度具舉四維高張天人協應儲休降祥甘露零庭朱草豐唐奏韶濩之樂舞襲山龍之文章故道與天地同流而德與黃農齊光也日出作兮日入息道平平兮無反側旋乾坤兮 帝之則賡卿雲兮臣之職歌九功兮頌七德播永永兮長無極



心賦 擬荀卿子

焦袁熹

爰有柔物窅窅茫茫能柔能剛能陰能陽能幽能明能炎能  
 滄意存而存意亡而亡宿於何所馳於何方先生洞鑒弟子  
 願詳曰此夫與天地偕存而不毀者與欲窮厥根而莫知所  
 起者與妙萬物而不自為體者與得之則生而喪之則死者  
 與散為千億而無之非是者與升霄潛泉而曾不移晷者與  
 日中無影而疑於神疑於鬼者與俄焉而竄亟往捕之而與  
 之俱徙者與至人恬漠君子翼欽作狂作偽乃獸乃禽微乎  
 危乎哉彼良箴未諦厥狀強名之心

述志賦

焦袁熹

嗟予生之坎軻兮廓獨處而遐思啟陳編以坐誦兮覺前修  
 之可追昔顏氏之屢空兮夫子乃稱其庶幾固得聖者為之

依歸兮亦由嗜學而弗衰苟鑽仰之憚勞兮孰時雨之能施  
享簞食若鐘鼎兮甘一瓢其如飴居陋巷之恢恢兮恆彈琴  
而詠詩豈飽食之多得兮蓋味道以忘飢何退之之失言兮  
謂細事之易爲惟憤發於中情兮違權衡之所宜輕世爲不  
可與語兮已亦近誣而蹈欺彼有唐之豪傑兮詎志趣之猶  
卑伊時勢之不同兮歷艱辛而無詞信顏樂之難尋兮儻孔  
卓之未窺後死者誠有志兮懼斯理之爲疵循先喆之遺軌  
兮庶無惑於多歧日孳孳於博約兮固樂此而非疲諒吾道  
之未喪兮雖困厄其焉悲感玉汝之厚意兮媿無德以堪之  
甘頽廢以自薄兮迺傾覆而勿疑譬嚴霜之冬零兮百草同  
時而畢萎惟衆庶之不才兮甯皇天之不慈寤怨尤之無庸  
兮又何憾乎舉世之莫知

侯軒賦

沈近思

仰穹昊之如蓋兮遠蒼蒼其何極弄日月於如丸兮紛往來  
其相織春與秋而代謝兮等光陰於過客人生在其間兮曾  
不能以止息憶少壯之如昨兮儼白駒之馳隙曾轉盼之幾  
何兮忽衰老其將及視茫茫而漸昏兮髮星星其化白聰明  
之日減兮意氣亦復非昔愧此身之屢變兮難比質於金玉  
雖聖賢之當此兮亦無所庸其智力披遺書以三復兮曰侯  
命而不惑謂齊彭殤爲妄兮問何事之真實一死生爲誕兮  
更何修之親切青春其不再兮欲追尋而無覓逝水其不舍  
兮欲畱停而無術憶往以悲來兮對秋風而飲泣歎老以嗟  
衰兮覓丹砂而駐色徒計較之營營兮腸九迴而百折苦寤  
寐之逐逐兮心冰寒而火熱豈知大造之有定兮曾何加於

損益是以智士惜時仁人愛日驗道體之離合兮必須與而  
敬惕決吾心之存亡兮功不違於終食勿以去日爲多兮行  
百里者半九十勿以來日爲少兮賤千金而貴一刻百年非  
久兮供庸流之浪擲寸晷非豐兮成奇行之激烈或半生守  
正兮忽末路之變節或畢世浮沈兮至暮年而改轍謂五十  
其始衰兮遽叟知非而進德謂七十其稱老兮尼山寡過而  
學易謂九十其既耄兮衛武賓筵而戒抑謂啟手足其知免  
兮曾氏彌留而易簣一息之尙存兮此志不容以懈忽對衾  
影而不愧兮待蓋棺而論畢日汲汲其不遑兮學孜孜其弗  
輟惟憤樂之循環兮已相忘於歲月何思而何慮兮何憂而  
何戚苟朝聞而夕已兮亦順存而甯沒請以俟名軒兮庶有  
資於時習

君山賦

諸大文

維荀卿氏自齊屈楚春申客之殺潔醴湑唐睢碁罷魏加弦  
撫汗明朱英清辭含吐爰圖江上之山敬乞蘭陵之賦荀卿  
曰唯唯此夫壤移句踐蹟變周章石殊赤松洞異庚桑者與  
此夫并窺虞舜里連泰伯碑邇孔子邑纘季札者與此夫策  
志壽春名勒黔中勳蓋泗上封冠江東者與此夫道疑龍尾  
館傲罽人躡珠履馬縹紵衣者與在昔胥女岵巽更名白  
石云山路邱抽思何極劍迺湘洲蘭生洞庭木落正平賦騷  
寶麗且則請假十二之峰式示三千之客春申君迨爾而笑  
曰信美先生言質采絢僕知楚國之相不足貴而桃夏之宮  
不足戀也敢寵茲名永昭終古聿鑱詞於黃山用流聲於歇  
浦



欲舉辟而焉遵吾將駕而升天兮誰爲御此飛龍卽帝所恐  
亦雜喧兮盛豹虎之唁唁固不能被髮而文身兮狎蠻夷於  
江之南寄委蛇於其首兮蓋庶幾乎堯舜之舊風託彭咸以  
訴帝兮何迤迤而不救於下帝若怒而反見尤兮羌獨抱此  
愁苦海濱兮歸來逝千年兮飄塵埃舊處兮安識波潮兮魚  
龍哀去夫子適遠兮時俗逾敝而不可論昧柳下之廉隅兮  
以骯髒而爲仁衆垢黨而曷分兮裏幽夜之纏昏鮑則貴而  
咸芳兮變牛矢兮荃蓀盜跖固以爲聖兮唯鄉人之德馨苟  
光白而宜怪鋤兮非巧善其孰完魯蹈海而爲義兮櫻衆眦  
之所頑申抱石而成哈兮或猶憎其勿先信可謂之詹詹兮  
雖天戕以曰欣獨登山而悲吟兮將鬼神以未延吾又安知  
其終兮痛鳩臆而疑填幸夫子之不及此兮夫甯飽周粟以

自安夕霏霏而合宇天莽莽兮垂寒浚濤涌兮摻松修隴漫  
兮淒泉鳥烏噤而不鳴兮叢狼狽之號盤將澗笔而不敢享  
兮恐謂此其非蠲羌眷眷而旁皇兮誠不釋夫所怨亂曰肅  
肅凜秋歲徂窮兮合沓驚沙振衝風兮率彼曠野安適從兮  
徘徊沾臆道何孤兮我思古人如黃虞兮煩憂惻傷不可殊  
兮時則辰兮世而殆兮歸哉歸哉信子非隘兮

和感二鳥賦

胡天游

吾安悲乎悲軋軋而曾抽甯扼顛以自嗟佇擊涕而中仇瞻  
行道之茫茫聿交弗而云穢隕霜雪之繁傷愴靡陽以謝煒  
顧奔流之滔滔橫淪墊而方地來哈恍以安懷誠飲食其未  
理竊不諒夫艱難固又莫可以衆謂志遑遑曰有屬非得位  
其焉如叩君門以天峻儻不悅乎陳書噫吹笙而被繡或造

第而椎車苟詭得其若易懼予枹之良虛獨佞佞以遵路適  
投笑於嬰患思屈曲而相繆情輒輓以爭紱感微物之何知  
觀光榮於二鳥顧竊被夫寵佳彼奚功而茲寶歎時數之未  
來卽聖賢其安道呂曉發於著龜乃唯師而輟釣說違夢乎  
高宗亦楮築以終老遂卷懷而歸驚羌忽忽於予心企蹭蹬  
之去昨翻濩落以滋今甯屯理之尙駁詎於皇之匪仁萃殷  
憂以孔迫顧何疚於予身昔三后之相承託優游於聖庇孔  
乃息乎周行軻無勤於辨說惟曩遇之云乖實旁皇而私冀  
幸帝命其未湮俾相予於終致旣贊尹而和錢與昌饗以旦  
濟就久約其庸傷庶逍遙以卒歲苟眎道而良睽憫戚蹙於  
已瘁病折閱以莫羸祇皇皇以求利中得失焉自患斯倍辱  
而尤鄙幸輦帶其旣磨夫何辨乎此類

竊曲賦

胡天游

余讀呂不韋書周鼎有竊曲狀甚長上下皆曲以見極之敗  
也因爲賦云

天下之可極者唯取道而已矣積衆精而自光雖殫獵而不  
匱盡錙銖以爲嚴駟兮諒何斲於天地已愈有而愈多兮反  
以適夫聖智故逾極不做於中兮苟在欲焉斯戾嗟衆情之  
庸庸兮固德蕪而義昧託編衷以自逞兮方進極而未已紛  
吾欲竭其所趨兮雖萬里其猶邇將毫芒之畢鉤兮昉甘膺  
而快肺始涓涓之不絕兮亦纖纖之朝蔚終揚洪而激海兮  
陋鄧林其何穉意填滄溟未塞兮氣躡華岳而尤厲相駭馬  
之怒蹄兮雖銜勒而未制况縱鴻毛於順風兮忽飄疾以安  
繫乘盛大之曩馮兮作壯頌而物惴聚萬理之不然兮輕決

快乎一肆切齟齬以睚眦兮疇靡違而已泰永恃以爲用兮  
曾不逆夫人之志謂窮始而卒畏承兮信無虞乎終異甯知  
夫鼎薪益而烈長兮水遂應之以沸彼燔林以獲禽兮比燎  
原而躬害芻豢則悅口兮饗輓中而後甚若飲食且不可極  
兮卽嬉戲其尙戒吾獨何爲羨金鼓之滿兮乃授人以樂概  
彼好極焉不仁苦秦項之非類頡威力於其工恣虐玩而兇  
賴託人頭以畜鳴冠沐猴而喑噫縛黔細以毒蒸謂砧櫛之  
可噉享鋒刃其未飽又以飴夫坑隄迫一復不可收兮若羣  
券之責債身醜糜而族碎夷兮禍酷刻於出倍相東野之逸  
騶兮善顏生之鑿敗閔逐獠於子陽兮狎顛危而爲汰豐底  
營以射干兮慶窮奸而犁粲故極無不反兮實張弓之道在  
昔夏后鑄金兮列山林之魑魅使民知不若兮避姦孽而罔

畏孽在物可追兮產自中而始癘惡不可滋孽兮懼凶衆而  
成殪故周鼎設象兮昭竊曲以貽示幽不稟於成康兮厲仍  
迷而遭蹶後宜監於茲兮等桃及之爲佩若後醒猶可補兮  
冀捐狂而得惠悼終懣於荆靈兮乃鬼神之所棄始角吝而  
上窮兮蓋亢極而徒悔唯保中以樂豈兮庶安欣以勿沫

方竹杖賦

胡天游


有一丈人來自閩壩入室卓爾負壁不言主人怪之就而察  
焉睹其薤蒼霜露軀貌瘠黔其壯也未咸巨伯之拇而修也  
欲俯僞如之顛顧折節兮不可厲廉隅而愈堅發著占之遇  
坤之六二動而之震曰此夫虛其內而直其外者與抱其節  
而不受命於歲者與溫如玉而廉不劔者與稜角而無陷厲  
者與雖衆君子之獨處兮猶鯁介而不比洵嬋娟之美猗兮


夫孰知其執規矩而自憐無鱗甲而不狎兮固外強而中悴  
誠落落於難合兮貴其性之所異嗟員俊之盛行兮懼方格  
而爲悴倘乖好之或殊兮或遭刑而成累唯歸諸介石不易  
者焉蓋庶幾物各從乎其類俾荷蓀而遐征兮若形影之相  
係更配夫方山之危冠兮夫何異乎元季

靜夜秋思賦

胡天游

秋蟲兮夕清秋猿兮夜驚引流螢於遠幔飄涼露於閒庭靜  
朗金闈空融素闌韻瀨蕩疑芳翦樾晃眼河長吹腰風結  
修袂暈煙纖羅洞月月華兮暉暉煙景兮微微微微兮不散  
暉暉兮愈遠遠映兮水濱珠紫兮綺文網空明之宕漾約秋  
思以迷人迷人兮延佇幽憂兮誰訴良夜遙兮玉露搏泣羅  
韞兮步跚跚菊花芳兮蘭秀怨夫渠之將闌將闌兮未歇尙  
同心以堪折睠情悅於美人傷長期而逾濶聊騁望於雲閒  
溯微波而難接欲寄情於桂枝徒螭蜷以樛結擊明光以贈  
君兮庶天涯之不別





天武之木... 而... 美人... 幽... 空... 雲...

鐵琴賦 有序

鮑皋

鐵琴仙者生乎乾初承至剛之氣好以造物鑪錘為已任黔  
羸有者恥仍之其先為清微仙使天帝使為山仙恐與眾山  
若劫為鐵岩鐵嶺小者為鐵邱山成遊於下國時聞庖犧氏  
作琴心嚮之亦不欲削桐繩絲與庖犧若退而自化鐵琴乃  
成歷億萬劫其剛自若也有神皋子者過而奇焉援琴賦曰  
邈至音之繇生兮維二氣之轆轤震何乘而為霆兮巽焉託  
而為風運妙有於無闕兮奏自然之鏗鉤降至太皞察絃遣  
聲故叩木者角聲而伐金者商聲角何卑兮曰民商何次兮  
曰臣追音籟於顛古詎擇物而後鳴矧夫琴也規天矩地兆  
風之八協時之四納正宣和抽元揚麗穆穆洋洋非意所擬  
迺求之者必擘陽牂牁廣都國阿繁玉寡繭綵合紛加徒引

國朝文錄

卷七十一 賦類一

鐵

刻於圭撮嗣末響於幽遐既風氏之先我盍遊乎太一之初  
爰有鈞霄上客發軔帝閭至德不囿至音無方迺廓舊墨歸  
於至剛方夫鐵琴之作也八絃爲之盪駭萬罇爲之薄激伊  
陟絕嶽而懣服夔襄珥柱以脅息彼匏巴田里之徒莫不心  
神茹形悔遁而出當夫重光統幹浩灘布枝厥土爲赭厥山  
爲茨日本之雙魚呀呷昆吾之二獸躩踞箕伯奮斤於黜洞  
謝仙叩鍛於元厓故聲之剛而屏怒者進聲而失和者隳抱  
鏗者咸發隱鉤者畢窺爾其岌岌峇鄧琅錚鑛鏞鏘鏘鏘  
鉞鏘鏘鏘鏘若焱豎錐若雪匿揆錄揮鏞擢繩擢鏘鏘者既  
已決振者亦已屈縱縱兮鏞鏞琳琳兮號號雖舍夫七始之  
音猶未叶一元之律於是祝融司冶熒惑掌炎睢盱鼓囊葶  
收督先帝車列軫繩河進絃渾象而制不假精研要皆煦陽

嫗陰孚旨而竝趣始造於琴道之自然迺周絕垠超殊巔尻  
縣圃肩九關狹牧子於商陵卑伯牙於魯山鐵琴甫張而命  
操已聞乎奧區之間夫何飄邈而廣賁兮泐泐而無儀也擘  
緩而容裔兮愔愔其可思也壯我我之將徂兮儻湯湯而逝  
也澹容容而既同兮忽憑憑而異也於是鈇然徙軫鈴然變  
節左擘雷窟右拓風穴地失痛癢天轉喉舌狂電擾蛇奔霧  
投蜺大而不盈細而不竭直而不倨柔而不懾故其動也則  
揚谷歛日其靜也則寒門遁月其紆也則迴棧髮引其促也  
則驚潮帛裂吟龍子於清冷之淵挑鳳女於嗟我之闕別兩  
曜於黃赤之交按衆度於弱彊之列神耆眇而喪精泰容嚙  
而挫咽師涓毀曲於淫衛雍門輟謳於弱薛凡操桐者莫得  
而和之迺悟至音之在鐵鐵琴仙迺笑而作退而歌出乎炎

炎之剛歸於巛巛之和歌曰至德去德兮至音去音家莫為  
囊兮胥靡為械帝心既不予疾兮彼造物亦莫我姓與顯氣  
而偕遊兮又何存夫鐵琴

國朝文錄卷之七十三  
賦類二  
惜陰賦  
朱仕琇

國朝文錄卷之七十三

賦類二

惜陰賦

朱仕琇

仕琇五應舉而不遇媚時廢學一身將老春山閒居作惜陰

之賦其辭曰

考書屋於連山兮蔭春木之樛紆信密覲以謝囂兮兼古訓  
之可娛何艱施而不安居兮悼營貴之可吁眩爵祿之巍巍  
兮忘君子之慥慥曾不知命之不可為兮五拏舟以南道情  
棲棲目瞿瞿兮苟中科其忘菴欲興時以致功兮固不計乎  
夷難棄幽居之間曠兮涉砰礪之驚灘水乍怒而激矢兮山  
透迤以相盤駭卉木之糾紛兮風浩浩其度巒石齒齒以來  
拒兮水爭道而愈愾人綽舟之累累兮將求進而故退謹動

天以為狗兮懼後舟之來逮雨淫淫以抑帆兮毒氛羗其晝  
 晦指前覆而驚心兮紛祈神以夜酌嗟孝子之不臨深兮何  
 寄命於波濤也欲攀援以就陸兮哀跳咀之類猱也行水陸  
 之大險兮固輕身而有冀傷不智以肆貪兮經營十年其無  
 異時熒聽於妖祥兮曾莫辨夫梟鴟龍力父以專室兮惡閭  
 媿而不婚繒纒為寒兮白紵為溫游儻頽首兮涸此大鯤謂  
 予之更行兮心甫信而旋忽命御車於山下兮輶隨馬以迴  
 麓既所守之難變兮安辭世之我愚璞豈必解於非鼠兮藥  
 何明於非污郵墨卷以驚時兮蟋蟀鳴此牀前歎知人之難  
 觀兮舉世自以為方歎飾鴛而黜驥兮廟及巷以相牽性駘  
 猥以為馴兮足卻後而若前固愛憎之至變兮亦命理之使  
 然邦有道而貧賤兮懼予躬之匪賢徒矻矻以無益兮果淹

沒其歲年念白日之侵馳兮逝將理乎詩書考性情於祕笈  
 兮進師友於卑窳彼城市吾不入兮矧征道之崎嶇漫稽天  
 以滂湃兮家坐釣而舒舒豈不仕以高尚兮幸自釋於驚虞  
 業朝暮以肆肄兮春與秋其遞偷維分陰之足惜兮敢致歎  
 於勞劬緬古王之逸迹兮相規矩而步趨苟身修而名立兮  
 可以當夫貴無念生命之蹇難兮中夜泣其漣如亂曰閩波  
 謫詭其石疑兮茫茫禹績斯地遺兮聖猶愛日我盍儀兮棄  
 貴就賤卒委蛇兮

懷舊賦

朱仕琇

仕琇年十五以文受知於河南程冠文先生拔冠弟子員先  
 生優之以意嘆賞周至郡中之居門下者蓋無先焉當是時  
 仕琇實未有以異人也其後稍知自奮窺古人立言之旨以

爲文不敢隨俗澗忍棄天之命蓋亦先生之有以動其意也  
不幸學未成比枉於試姍笑多口仕琇大懼身之不肖以傷  
先生之明朝涕暮吟蓋無虛日後九年始餼於庠連躋貢院  
而先生亦去 朝廷仕琇傷知已之難得而又自恨不得一  
進所業質於先生以答其意乾隆七年仲夏山居作懷舊之  
賦其詞曰

居悒悒兮予有思矢昭日兮陳所辭女爲悅兮士爲知情難  
忘兮禮亦宜念中州兮深涕洟中有人兮維予儀露瀼瀼兮  
百草滋公有恩兮予得私羽予覆兮氣予吹肉白骨兮生鬚  
眉澤霑天兮渺無涯約之一束來予貽公之往兮詫生噫白  
晝赤口刺天飛詬尤上下紛是非余不才累公受訾感公愧  
公淚漣洏嗟予遇公惜非時辱公厚意於童兒弱不能答心

追悲勉爲賢兮謹自持規前哲兮行忘疲治古言兮日孜孜  
公不來兮紀二棼身欲賢兮誰相慈出攜所業無攸之伊予  
雖困敢自隳惟公神日鑒在茲苟能賢矣不辱師君子之徒  
以爲歸成公知人無公疵仰冀慰公答其私



或正錯以成文或偏纏以立體文則極變蕃於點畫體則分  
 屈曲於比議各擅專長竝臻精詣豈知婆羅門之傳日以謔  
 反覺許叔重之徒有未逮試觀三十六字之可循遂屬一十  
 四部所不廢是以切韻之行竟成象類之髓斯則耳根目根  
 之功德或不能不參之西竺以舉其大致而通儒夾漈之徒  
 皆為畱意者也然而屬國之風土不一故其文亦不齊不見  
 夫鴻臚所掌翰林所司鐸衮信甯所共作谷神合刺所分攜  
 八思巴所專造畏兀兒所兼施勃海所通隸夏州所別垂驢  
 唇所肖蓮葉所釐符篆所象半隸所規其種錯出其狀紛披  
 試尋舊籍以及殘碑蓋王會圖中之變態差足擬其奇也揆  
 之古法非盡無稽特其所至有合有離外蕃諸書亦間有與  
 古韻合者世多弗知知元符之所鍾必有待於昌期至我 國書始克應之在昔

風雲始起制作堂堂赤文綠字迭貢其祥惟兩文成不亞朱

囊一曰達海一曰額爾或作或述接武擅場治官察民王廷

以揚宜追古初精意渾茫如蟲如鳥以發天光時則長白之

山兀兀鴨綠之江泱泱互嶒岵而鏗鏘効神助而呈寒芒博

討於一合再合三合四合之旨上參夫二體六體八體十體

之長汗流次仲空傲羸皇雙翮匆匆遁逃何方其綱三十可

舉其目二百可張爰布九垓以訖遐邦用書 制誥兼摹印

章極之奏疏幡信無往不臧乃命詞察部帙必良以編 日

講史則紫陽更有文鑑石渠之藏設科取上上擬漢唐有如

說文字林莫敢謬忘館閣新進亦復無荒然而其中輿論則

欲家諭戶曉而未遑也迨夫 天語指示直破元關謂喉音

最初之五字實為聲氣之元彼諸部之相生皆於此乎發端

其四聲之諧此者蓋亦至尊而莫干諸韻之切弗敢加焉擬  
諸黃鐘之不役於他律卽以之定管而無難彼千年之疑竇  
遂解滯結於連環卽支齊微七更連音以紐切又足定等於  
不刊蓋聞詳等而畧韻者宋時康節之譜詳韻而畧等者近  
人亭林之編其功雖密其法尙偏孰若 國書之獨擅兼二  
者而俱完較若寘掌洞如隔垣三蒼雅之所未發三菩提之  
所未宣萬聲具舉萬音可殫彼鮑卿之雜朶目蓋渺焉其抱  
殘而後知天下之聲出於喉以啟其籥亦收於喉以握其閑  
何以定母卽取其能生本音者而自叶何以定韻卽擇其能  
收本韻者而罔愆緩讀之爲二字以互括急讀之成一音而  
了然清聲之字則本韻之影母所攬濁聲之字則本韻之喻  
母所甄是則合聲之法所以爲和而無戾簡而不繁者也然

向非神明之天縱一一呈露其淵源誰指示夫秩宗以大闡  
其微言謂尚書餘文情訟賦舛學爲二文賦微嗟彼穉蒙未函  
雅故干祿負慙署名失措既闕茲旋差杖杜馬不足一者  
喪其全虎有踰六者乖其數二首六身之未通一束兩縫之  
莫諭舟二閒則失偏旁門五日或迷推步昧緋衣之小兒訝  
黃絹之幼婦柳耶雖同焉烏易誤疊韻未解卑棲雙聲致疑  
互護窳龕之鏡未諳蠟頂之話誰遡有孤識字之名何補同  
文之肅方舌橋而目迷安定居而分部詎知菁華之不朽遠  
軼乎聖民之舊製好古者罔疑問奇者小悟豈勵如拓跋之  
附解於史篇直足令揚子之力窮於油素

輿圖賦 有序

全祖望

成周人司徒掌建邦之土地之圖周知九州廣輪之數辨其

山林小澤邱陵墳衍原隰之名物土會土宜之法而大司寇之屬職方掌天下之圖辨四夷八蠻之人九州之國使同其貫大宗伯之屬保章以星土辨九州之地所封之域大司馬之屬險掌建九州之圖周知山林川澤之阻達其道路大宰之屬司書又以地圖得知山川之數經野之學見於官禮者如此其多然猶未溯其原也在昔風后受圖方州始定蓋世遠莫得而傳至若聖人作易仰以觀天因吉凶而得象俯以察地即圖書而作則所謂圖者山川險易星土分合之圖是也所謂書者貢賦多寡九等之書是也圖之繫以河書之繫以洛則以天地之中實在河洛之間其中南北高深之故聖人所則猶之吉凶之象聖人所法蓋不離乎周官之載者近是日夫圖書歷有原委穆王大朝黃山披圖視典而蕭何

得秦圖書以具知天下之要孔安國爲博士具見圖書以注遺經即武皇亦據圖書以知河源班固亦本圖書以成地志蓋皆河洛之舊本也典午以降周秦祕書既絕司空裴秀按漢人括地諸雜圖粗具形似不爲精審於是作禹貢地域圖一十八篇其體有六一曰分率二曰準望三曰道里四曰高下五曰方邪六曰迂直圖學之大槩略具於此而以二寸爲千里唐賈耽作海內華裔圖從三丈三尺廣三丈率以一寸折成百里宋之祥符李宗諤亦嘗作圖其後稅安禮亦作地域指掌圖元則臨川道士朱思本作輿圖參之梵人帝師之祕圖與宋舊圖互譯而成蓋用功十年而自謂無憾今世之所存者勵有此本而亦多爲明人轉相增竄名以己圖獨計程畫方之法猶遵其舊耳明嘉靖中山陰周繼志地圖極爲

世所稱縱八尺橫二丈每方百里今已鮮足本三古圖書之精意誰克紹之且夫圖學固難而其中以星分合方域爲尤難自古學失傳康成謂堪輿所載皆非周禮之法而自漢志而後有以十二分野配十二國者有以二十八宿配諸國者有以二十八宿配禹貢二十八州者有以北斗七星配七國者有以二十八宿配禹貢二十八山者有自邳鄆諸國而下皆配之者其說之支離誕妄莫可究詰明初亦有清類天文分野之書不過以舊說附會而已孰若聖祖皇帝陋術數之妄傳成函夏之通譜上參夫萬五千里之升沈下綜夫千八百國之廣袤蓋先聖先王河洛之傳由此代興以臣所見賦此圖者大都侈張版章之四闕而至於著作之精則莫有能爲之發揚者乃拜手稽首而爲之辭

蓋聞神禹敷土功成四宅厥有六章豎亥以步八極由來天壤之廣大雖上聖不能以懸測苟非目驗無以登史官之籍也然彼其察地而觀天如芋區而瓜副既求合於寰海之綜羅復取必於豪芒之備悉斯則雖轍跡之徧周或不能窮其界畫古人日遠精義難詳分辰渺渺分野茫茫祝融顓頊之墟特其略臺駘闕伯之籍且漸亡裨竈梓慎之言不可究費直劉向之說誰最長而況乎窮騶生之瀛海申郭璞之大荒固宜南人則駭夫蓋屋北客則昧夫浦陽是以後有作者多走且僵神聖挺生苞符有曜蒼精孕靈黃牙抉奧上契昊穹下諧富媪九野三辰捫霄可照六狄五戎梯航畢到漢典唐經藐不足道乃以睿謨而成鴻裁本周髀之微言通泰西之障得方田少廣之術雖遙平方立方之旨未晦九章

可乘六崕不害三隅所反五曹已在麻數既以肉貫弗輿圖亦連珠入珮隸首運籌商高經界桑欽郭璞測其原闕駟鄺元別其派婆羅門通其郵利瑪竇觀其會張騫探源元奘志所以中西會通之算計地理之說但依度而推則尤為不刊誰謂星遠可算而備誰謂津遠可計而逮量天則垣次立成度地則疆理罔戾既盡掃夫蒼帝亦帝白帝黑帝之支分遂遍歷夫深土升土成土信土以行適甲以為輿邊以為蓋乃益信夫天之乘風而浮地之得水而載今夫陽明幽昧之度最不齊山川原隰之區亦多隔內衡中衡外衡之程各分南洲中洲北洲之勢互易或以順舒或以逆闢左寒而右涼者天之所虛右熱而左濫者地之所厄兩遙而一近者廣無可裁兩近而一遙者輪無可益是皆良工之所臨卷而經畫者

也而乃方員肖其區盈縮協其度從橫當其程施受諧其勢三百六十度為大圓三十有二篇為分注析之如碎金之各致其精合之乃完璧之共成其聚一鄉一亭之罔遺一關一隘之有據不須屑屑於五洲底事區區於兩戍三條之脉未該九邱之文如遇三十二圖合之可為一圖分之雖一府天門更無上可尋地戶更無旁可覩斯真曠千古而誰同抑亦俟百王而莫具且世亦烏知夫先皇觀察之神也耶在昔萬機之暇游心經苑石渠燕御折衷譎舛太乙之藜榮光高遠汝羲朕虞各秉斑管敷言之出粹訓所選試舉一二天驚石轉彼夫堯典分州以十二而遼海羈管於東青越海為境民莫能名亦粵後王分州曰營有周并合以幽同稱兩漢而降分州曰平其於度屬之故終弗能明也不知導山有源一

氣烟熅長白之峰岱宗所因旁皇乎舊都斜出乎析津乃飛渡於金復之島膠萊之濬帝出乎震人生於寅惟彼太宗之

自出所以為六嶽之君斯其神悟誰克敷陳太山發自長白

所以統轄三韓也榕村李氏欲申明御製東嶽廟對句也大

江之出舊曰岷山或者疑之莫配河源乃指金沙諸水以臆

為言荒荒徼外安所覽旃不知出於河源之西遠在諸番金

沙諸水次第歸焉若其阨塞乃在黃勝之關即岷蓋自西師

告捷使節嗶嗶古所未至盡於極邊而後探討罔不了然三

危苗裔諸說紛綸昆明居延人各有云不知出乎甘肅直接

滇雲瓜沙西峙緬甸南分當年吐蕃之建節鐵橋所屯三藏

鼎足以相為鄰斯即三危得所未聞三危即今西域之三藏

諭兼取證於佛經其博也乃若俄羅遠絕奉我王路始獻輿圖古所未覩

其去北極不過廿度爰識颯鼠格物之助是則固會同之閒

情參要荒之掌故廓千古之見聞而正昔人之譌誤者也於

古鴻蒙蕩析神禹甸之於今海宇清宴 聖主闡之皇皇是

圖精深簡練斯為寶書二儀永奠自古有作輸茲盡善聚米

可觀畫沙可踐獨憐小臣披圖易眩俯察未能揜卷三歎以

藏 清廟以陳明堂以頒太史以詔職方又何藉乎馬毛又

何藉乎龜文懸之河洛上燭蒼閔括地之象推度之占方斯

蔑矣應自媿為小言之詹詹也


國朝文錄卷之七十四

賦類三

平定西域賦 并序

紀昀

臣聞弦弧剌矢肇自皇初帝王保大定功莫不式辟四方奮  
 揚威武伏考夏征有扈大戰於甘商伐鬼方三年乃克六月  
 江漢常武諸詩發揚功烈鏗鎬炳耀矣然南不過淮徐北不  
 過太原求其震疊威靈有征無戰奏膚公於指顧揚天聲於  
 萬里粵稽書契未之前聞欽惟 皇帝陛下斟元神樞撫臨  
 函夏桐生茂豫巖處霆聲日月所照莫不砥屬準噶爾以元  
 人牧罔竄伏西荒蠶食諸蕃濊成四部恃其險遠睚眦不賓  
 列聖以來屢干撻伐玉門絕徼三窟猶藏近乃窳匿奧鞬  
 更相攘奪拊離日貳迭構豐端因使達瓦齊赤虺白狼乘機



竊據毛鷲搏噬部曲離心休屠渾邪之名王呼衍須卜之貴  
種籲求 天討率衆欵關此皆至治馨香三年助順故天人  
合應代我驅除衆驗響臻大勳顯兆 皇帝規萬年之計答  
眷顧之心命將出車戢凶禁暴牙璋方起捷書旅來鋒蝟  
斧蟾莫敢齟齬不煩涿鹿之戰盡歸白阜之圖後舞前歌渠  
魁已絜告成 太廟靈緒益光皇哉唐哉厥功至鉅夫兼弱  
攻昧殷土式廓覲光揚烈周道爲盛至於兩階來格三旬靡  
逆雖放勳重華德盛化神未臻斯驗也彼燕然之銘蒲稍天  
馬之歌益茂如矣臣載筆翰林職是歌詠謹拜手稽首獻賦  
一篇抒懽忭之忱揚 聖天子之鴻業其辭曰  
旃蒙大淵獻之歲仲春之月 皇帝飭軒轅之五兵申周官  
之九伐召司馬以奮鐔命元戎以秉鉞鞭列缺與雷碾拍櫂

槍於月蝟將蹴天柱之嶒嶸歷崦嵫而弭節蓋大一統之規  
模蕩平西域之餘孽也原夫準噶爾者昔在有元攻駒監牧  
執其羈勒馴爲臣僕和林北徙以分庭瓦刺西行以別族脫  
權擁衆於臚胸額參出沒於鷄鹿東突盧龍西抵苦谷控弦  
十萬飛而擇肉明十三朝未能繫溫禹而血尸逐我 皇清  
提挈天綱奠爲荒服迫九首之奇鶴鬪岑陬與大祿驅梟鳥  
以西飛析昆彌而兩屬渺隔越於龍沙久蛟行而蝮伏漸衰  
頑以鞠凶乃憑凌乎氏羌而肆毒爾其據康居掠焉耆蹴于  
闐躡龜茲凌小宛捲扞彌包西夜絡無雷跨娒羌與且未越  
輪臺與渠犁莎車鄯善疏勒姑師陽關二道烏壘所治十薦  
食其八九殆西薄於條支盤伊犁爲窟穴藏封狼與羆羆孳  
鞮右臂實在於斯其境東巴爾坤西哈薩克抵鄂羅斯之南

縈烏斯藏之北內瞰則伊吾柳城高昌舊國卻背則月氏罽  
賓大宛安息出五郡之故疆渺河源於絕塞蓋距 帝京者  
萬有一千三百餘里尙綿延而未極其險則陰磧摩天流沙  
界域兩戒蜿蜒崑崙南絡乎搏克大山接嘉峪之關路  
嶮巖以歛仄北盤乎阿爾泰嶺據大地之脊攀星斗以仰逼  
杭靄分枝出乎其助日月吞吐雲霧蔽匿猿猱爲之却步飛  
鳥爲之斂翼別有塔爾奇嶺嶮逾邛夔洪河中坳界其閩闕  
苟持戟以當關雖萬夫其莫陟是以豺虎縱橫恣爲凶慝白  
環之貢不修南仲之師屢棘宜禾之尉罷屯契苾之碑久泐  
微 聖代之天威固莫能控制以銜勒昔噶爾丹之逆命也  
仁皇帝操井鉞揚參旗驅谷蠡馘屠耆凌姑衍震燕支總  
桓桓之七萃凡三駕乎西陲鞭應龍於大野取蚩尤而戮之

姑旁存其一綫示解網之鴻慈爾乃涸鱗更躍妖鳥難馴銜  
干奮舞馳突風塵窺我瓜沙之屬國納我青海之畔臣赤囊  
旁午白羽紛紜 憲皇帝審五稔之未盈用偃革以甯人戊  
己校尉屯田將軍九象之力繫金鎖而守以庚辰蓋待天時  
之至而後捷伐是申也 皇帝是以揆人事測天意審地形  
定軍勢因搏噬之相殘知楔偷之將蹶緬巾機之銘辭曰日  
中其必焚玉弩西垂雷霆碎磔降王執挺前茅楊旆張兩翼  
以合圍若繡禽於月窻羌角之而倚之俾顧腹而失背西則  
交河之戍天山之口蒲海蕩瀾火山焰吼巨靈擘山以前導  
河宗鼓楫以左右太白荷戈以旁驅尊收抗旌而奔走奮雄  
劍而一動蹴雪山猶培塿北則東受降城拂雲之祠出五原  
摩浚稽渡匈奴越眩雷召燭龍使炳夜呼元武以揚麾倏箭

雲以飈捲紛冀馬與燕犀直歷乎陰山之北而出乎白龍之  
堆爾其移玉帳傳金柝騰白鶴鞭雷駁淬芙蓉礪龍雀占太  
乙與河魁役猛虎與雕鷲巨礮飛屑以辟歷鼓角殷地以回  
薄山精瑟縮以遁藏狼星皎睨其欲落意困獸之猶鬥或窮  
鳥之必攫矧鯨鯢之千里不跋浪而一躍而乃五城翎侯二  
部昆莫降旛蠹蠹千羣面縛奉 詔書而稽顙信 王師之  
除虐毳幕羶牆左璫瓔珞瑩豆羶羊馬酮乳酪膜拜獻犒枉  
摩屨錯卽有彫虎黃熊飛狻健獲傳尺檄而定之皆弭首而  
就羈絡故師之行也迅乎若長風之捲霜鐸沛乎若洪流之  
赴巨壑崇關徹其闕闌復嶺失其峯嶸叱龍鼉以爲梁渡伊  
犁猶一勺迫游魚於沸鼎辨棲鳥於空幕左軍未濟右師已  
克飲馬濛池洗兵鹽澤犁庭掃閭曠然大漠刈苜蓿以爲芻

引蒲桃而滿酌檻已繫之飛弧擊靈鼓而大索威稜之所衝  
激猛氣之所凌轢鶴唳風聲中宵駭愕引虛弓而下之若驚  
鴻之聞繳蓋不待花諾海西之奔潰與圖爾滿部之就獲醜  
旅八千已知其一呼而盡卻飛走路窮可以縛兜題於縶橐  
於是插羽書馳列校日六百里飛黃騰蹕疊跡躡影捷音還  
到五月壬辰告收西徽藉場艾旃驅除虎豹伏莽百年歸我  
丕冒紹 聖祖之業繩武以維肖成 世宗之志繼述以克  
孝 列聖以來馨烈彌耀 圓壇 方澤精禋申報社稷是  
歆執律而造昭薦先師列懸振翮 鼎湖珠邱涓辰遣告練  
六月朔獻於 太廟華蓋下垂勾陳引導駕十二龍黃屋左  
纛雲旂摩盪日珠熠燿播七德以象功揚朱干而舞蹈薦大  
房之秘芬赫蕭火之煬燎讀版陳辭 光靈煜照是蓋王師

大獻之禮司樂之所掌樂司之所教者也越七日己酉諏日  
 惟良 皇帝詣 壽康宮恭奉 寶冊焯焯煌煌神龍盤紐  
 精鏐栗黃雲篆璘璠充籀軼食副以金簡青瑤爲章鴻文歲  
 蕤符采炳煇崇 徽號以十二頌 慈訓而顯揚慶荒裔之  
 救甯祝 聖母之樂康善必歸 親孝治是光遂闕闔闔臨  
 正位御太和殿萬靈祇衛龍旂肅穆以交拱翠罕卷舒於雲  
 際綵鞭奮響乎天半銅鶴噓香乎鉅砌委佩琤瑋華纓容裔  
 九拜奏賀東西雁綴爾乃渙汗大號行慶施惠百神歆沃萬  
 物沾漑金鷄揭竿以翹立木鳳銜書而下墜 丹詔一降甘  
 雨立霈合萬物之歡心感陰陽之合會蓋中外一家功成治  
 定與天下同慶之意也望後二日獻俘禮行於 廟於社昭  
 告薦馨翼日庚申 皇帝御五鳳樓楯戟夾陛肅肅魚鈴司

馬司徒左右祗承赭衣頰頰組練交縈擁以斧鉞聲以金鉦  
 獲虜免以旣脫檻雄虺而就烹囚貳負而右桂戮防風而抗  
 稜釋爰劍以爲隸準無弋之初名旣而西蕃外裔逃聽風聲  
 水慴陸慄效順貢誠捕樓蘭以對簿繫頡利以擒生捩赤豹  
 之長距鍛蒼隼之修翎束以犀革繫以長纓厥孥七十盡族  
 以行望虹旃以傳送拜霓旌而屏營驅檻車以詣 闕待藁  
 街之明刑六月庚戌西域悉平大書露布揭以朱旌十二晝  
 夜報達 紫庭歌舞交於朝市愉樂洽於萬靈四極四和  
 定永清乃命大章豎亥之流隸首容成之屬循黃祇之支絡  
 步道里之盈縮驗分野於昴躔考中星於昧谷測珠斗之高  
 下證銅渾之遲速七十二候頒示蕃族三十六國咸遵正朔  
 浩乎大哉此王道之極盛而三五之遐躅也是以百辟卿士

陳書獻議輯采芑之雅述征苗之誓作典寶於三朶校兵占於黃帝炙汗青以紀載授蘭臺而編次別采飲至於學之文準在泮獻囚之義樂石銘功靈鼈鼎乾坤之容莫能藻繪响嘍龍畫 聖謨垂制配十鼓於辟雍掩填金之寶氣教化之源觀光所萃瞻拜赤文摩挲綠字於鑠鴻猷永昭垂於萬世是役也動乎九天之上決勝萬里之外建斗極以握奇規地員而執契蔥嶺之陬視如指內開陵之屬役如僕隸熊虎之臣運如闔臂不須乎授鉞登壇禡牙軍祭如偏師以臨之蹴鐵山而立碎方叔召虎莫能測其機風后力牧莫能效其知按六經而校德合雜攝提未屈指以一二然而 皇帝方穆乎深思持盈保泰謹馭貴之大權示晏安之炯戒震動恪恭式序在位復與天下沿溯乎道德之源磨礪乎鄒魯之治

備九獻與八佾觀車服與禮器天保采薇文經武緯且將法周室之四巡準虞書之五歲喬嶽懷柔翁河哀對獎力田勸孝弟采風謠禮耆艾功彌大而彌勤卜億齡之永賴聲靈赫濯湛恩汪濊紉縵乎三光之昭明沕穆乎五氣之暢遂垓北乎元萌黃芽包二儀而涵蓋神州赤縣圓顛方趾之民其孰不以手加額稽首至地乃作頌曰河源星宿九折朝宗山祖崑崙環絡趨東參狼白馬詎外岍嶺 皇耆其武四海大同太陽燭燭是傾葵藿春雷震震蟄蟲胥作碎葉西臨版章式廓波濤不驚星緯咸若於赫鴻業光我 五葉我武維揚我仁載洽既畏既懷匪餌匪脅豚魚胥孚鼓桴喻捷孚彼遠人咸飲我醇鷹化爲鳩感我陽春灑灑元氣太和網緼臣作頌聲播示無垠



速跡閃億敵以走喻若乃屏息薊苲獨騎龍從顛月送明谷  
籟候登仡神取而聲授闢枝節而捻踊紛難得於百一羌寶  
貴而愈重所以皇克禹勤天錫湯勇蓋欲詔天下以金闕玉  
英之聖人其以勞自董也如是夫固踣躄乎三驅而從從一  
面而容容者也爰有石戶之農麥邱之老仰而歌曰石壁未  
明月胸眺兮舜與鹿遊日月抱兮匪日之出我 皇之明曠  
兮又歌曰農中巖兮老中鵠兮 皇帝來鹿匪鹿之好曰孝  
道兮於是黃伯烏獲之倫腰芙蓉之金鈇首鷓鴣之朱冠相  
和而歌鏡吹之篇曰我 皇神武飛天龍手摩玉劍弓朱彤  
大白小白法 太宗獨騎赤汗踏嚴冬雞跣鼙鼓擗蓼空  
山 帝到神靈從麒麟先路獅子從白鹿仙騎從躡蹤金哨  
呼夜鳴雝雝圍以正取哨奇攻如吹鳳凰雌雄筒與伏鹿鹿

文王同呼聲動天 帝還宮瞰東方出扶桑紅乃有陽乘執  
研雄固操觚幡然而進贊曰美矣哉 天子之為此樂無火  
也其始發也閃睽兮燭龍張舌裂眦出燭光日珠月珪兮星  
琳琅也其少泄也窈窕兮圓不見人若濛汜沸波而腹太陽  
其類召而輳也仵仵林林牲牲躑躑香千秋之頰葉而化黃  
金兮躋其上而不懼其得壽而可熹也若白鳥通於聲青鳥  
忘於機兮蚡歛兮百靈輸其福祥 雖離誌與翳經羌瑰琦而  
芟芒固至神之馭物感盡性乎我 皇然後上魁下能右師  
左傅拜手稽首而作頌曰於鑠 皇清得鹿以義先王講武  
非從禽是戲獸有圃草職於虞司秋肅冬結 皇帝有事古  
田法圍哨備今制呦呦濯濯咸樂 帝意在周卜鄘大獲師  
至文侯出虞示信於魏曰師予 祖德信予民志文慎不武

安慎不忘惟子孫無極敢告萬世

後哨鹿賦

朱筠

客有問於大夫曰蓋聞陶唐坐衢室而膺身來宮有虞氏恭己阿閣而鹿游於山暨乎周興大雅小雅繼之而傳故園詠濯濯之儕野歌呦呦之羣夫聖人者有其德矣而諸福之物協符香瑞其來員員方其盛也不東而蒼蠡連蜷以上旌不西而素麟婉憚以下驂未嘗行乎南朔而朱鳳翻地角元螭隸天門也是以神不疲而物莫不興智不煩而物莫不存力不勞而物莫不安今且將冒玉體而較霜霧馳金輿而攀嶺岈慄慌墮蜉躬親其中以與羽林壁壘之士進說哨鹿之事以為歡竊謂非聞都吁於伊媯陳保定於典章者哉大夫曰嘻若客之說所謂執秋蕪而議大椿引夏蟲而語飛雪曾無

論乎千里與八千歲而三隅不可以一絜也子獨不聞我

皇清之興東方乎 太祖以功立 太宗以德同十三甲堅

大小白良以菱涉山林用咸若乎鳥獸於時皇天錫以醫無

閭之北藪曰萬萬世惟武事是義昔者明失其鹿天下倚之

我 世祖角之得其大首克嚮帝德遂受萬國用是肩股乎

衡恆而喉嚨乎終華心腹乎洛室而頡頏乎代家蓋有天下

百有餘年 聖子神孫炎炎施施而未嘗一日忘大武之志

金矢而珮戈也今 天子樹日月之羽飛龍鳥之旂彈玉虎

羅金鯨以晨夕而淵思曰予不敢晏而娛以弛予 祖考之

武事維時天地令曰成冬 皇帝闕軒以納不周之風七萃

六軍碎發震興以並乎陪京而東乃獲鹿於高嶽大陵也夫

其下嚴寒之寥慄索重山於踦顛夜未央而無譁人連騎而

不見千年密林上叫鷓鴣墮葉幡纒焱風亂鬢瞰磨覆以騰  
倚呼牡牝而相飯厲長哨以裂雲崩蹄遂而角進呀駭走而  
投受儼異類其賚獻所謂蒼百靈以陸三驅而徇狂魑魍倏  
趨而竄夫迺知八荒九麓時有或不睨人有或不楚而大  
聖人方以爲八鸞於是麟而四明於是麟者凡以率德而聽  
訓躬艱難而教行陣也 至尊雖勞烏可以請間云爾哉且  
夫神龍嘘而成雲嘯而出入金谷至靈者之跡也 天子之  
中孚則及豚魚其教則可以馴羆虎亦 至聖者之覩也夫  
速者鹿跡決驟者鹿之性食則分背而居則環角鹿之警防  
而好儵也故詩曰麇鹿攸伏傳曰與鹿豕遊皆言神明之德  
配乎皇天然後五事之祥無所不致而萬物之智無所不周  
僕雖未觀其深竊嘗原其所由若乃黠者電避駭者雲迎孱

者似陂陀悍者似嶢嶠千態億狀靜視與聽灼若殷火之洞  
觀而周鏡之照形然後天下知 天子之明又如來角可憲  
去趾不嗔逢養不籍以巧鍛獲賁無取以力搏方其呼吸得  
失倩冽嬰散牲牲之倫擬議而不得安俄焉還御嗒焉空山  
然後天下知 天子之仁至於百萬羆士一二虎旅罷雷衛  
匡虎驅行所龜匪斃而麗麋尾猶生而捉塵想山靈之夜驚  
赤日緞其岳滸三光正藏星大小數然後天下知 天子之  
武况夫歌蒲梢而馬赭摩蒼厓而龍螭蛾眉大海銀角上園  
凌雲不足賦其雪時雕龍不足辨其瓊痕與神仙而騎驥頰  
君子於萬年然後天下知 天子之文爾其邪岐有原本之  
撫天地有恆久之道所以秋獮冬狩蘋湘苜蓿日月照天而  
憂盾火飲食旣庭而哦魚罩非卽鹿從乎无虞而奮衛本於

揆教夫非講以農隙荒其山高者乎然後天下知天子之  
大聖而孝由此五者古今至德之所選萃也皇哉美乎哨鹿  
備矣是故舜以至孝而象釋禹以至明而黃龍負成湯以至  
仁而蛛蝥祝文以彫獲武以蒼兕狩維我皇之至德請陳  
義於師右

登天井關賦

張九鉞

夫何太行之蜿蜒一石橫亘五千里而嶙峋渡大河以駭望  
猛若搏空之黑雲長風下掃夫懷州若崑崙懸圃浮嶢以無  
垠愁愚公與雜然叩石懇壤而踐循帝命夸娥以中斷庖然  
隙夫三晉之門曰八陁其大口將出乎井以登天初仰椀子  
之城穹然已足攬也虎口呀呀在人動也若鐘開弁又懸甕  
也蟻穿堙兮蠶抽蛹也往來若敵軍浩呼洶也鼠鬪夫穴勝  
者勇也於是躋乎羊腸之坂焉羣峯外刺層磴內縈蚴蟉窞  
覆詰曲嶒岷飛瀑衝齧崩樹轆轤斷而復續直而仍橫曳帝  
弓之虹積元冥之冰狙天闕之椽欒顛鬼神而下傾都盧無  
所施其輕趨法誕無所誇其趨騰手捫一十八盤昂然而上  
征獅象拏攫介冑凌兢一曲一變一勢一驚螺旋猿攀縷髮


急爭徐至於橫望之隘摩胸刺骨焦煙瘡痍出寸者踵入分  
者指似踏朽兀鬼窟在底足躡後頂手摩前履矍踴互戒蓄  
鬪相蹶腰腎鬪勇以綸困心膽挾怒而謫詭人聲繚紹於木  
杪鈴鐸懍懍於夢裏負河洛與嵩邱凜乎不敢回視夫迺嬰  
媼兮澶漫兮殫兮艱兮盡五十里八千仞中原之闌跨天下  
大脊而造乎天井之關其關也尻風陵隄昂車背雁門肘飛  
狐腋句注跨黃榆三河旋趾其下二華抵掌其隅包王屋以  
環城陔中條而作籬白洋嵌壁以驅泉沁水澆穴而犇池譙  
魯蠹乎黃圍之柱藺石布乎析城之陞弄澤州若彈丸噬嚙  
道爲兒嬉其頂鏡平崇墉碣基噪喋戈矛森羅旗雷霆拗  
其闕雲霞展其扉閭闔依以洋洋觜參探而摘之可以張萬  
幕屯六師樹河東之藩蔽阻上黨之椎埋喘定息休立荒井

之巔而望焉跨躡汾潞憑陵懷衛窪稜邢磁黑白荆豫睥睨  
秦隴呼吸朔代雄颺起乎沈寥彭山海以騰驤袖金天之沆  
漭揖鴻濛與雲將迷晴雨於昏朝積氣混成爲元黃踏大鵬  
之翼鷹隼紛猷而醜翔溯夫重耳於以啟南陽齊光於以窺  
霸晉應侯挾口以經營秦翦潛出而抗陣光武超之下赤眉  
高歡由之收鄴郡抱真得以守耕屯安史不敢踰尺寸李嗣  
昭鑄鐘鳴其巔宋藝祖負石開其峻凡夫代兆擠響之謀擣  
虛批亢之策絕阬隄斥之雄摧堅衝突之傑蟻附肉薄者愚  
刊木湮井者惑攻之則挫蹙之則頡據之則強失之則踣一  
夫當關喑鳴叱咤收山外之糧糧馬蓋州之鑄冶斬丹谷之  
縋縋縋雲中之鐵馬杜九塞之咽喉阻八紘之徽罔提綱力  
振建瓴勢瀉豈徒壯聲援界方夏蓋守逸待勞以一面而坐

制乎天下然而長城平大砦頽隄壁荒濬洫夷趙魏所扶擊  
梁晉所躡踞訪逮焉而莫知荆棘衰延行潦跣踞竄豹奔狼  
跳狐噪狸寒鴉對語驚蓬自飛於是慨然而興躍然而歎曰  
昔武王欲宮五行之山周公曰在德不在險遑哉斯言我  
大清仁覆義燾百有餘年今日郭月融廬邴連梁繩橋衢雪  
山禹亥所未步戊己所未官莫不賦田受稟疆之以周索戎  
索之間何有於隅隈卷石區區覆孟之安若夫効義薦紳繼  
家任子分卓程之雄貴好行德於鄉里伐嶺石以發磴窾昆  
蹄而鑿齒蓋自徑口越高平綿綿延延者幾八俱廬有光於  
前史洋洋乎絡繹亭障參差壘社羽檄安詳傳詣閒暇騾綱  
駢坐駝載相亞兜藍帷筍弼環乎其中行勝重繭戢香乎其  
罅渴者得漿倦者得舍富氓豪賈猗氏之商絳鞞貂褕弓鞬

矢房青帘招邀貽目炫樵山烏嘔啞巖花吐香與夫側耕危  
獲之衆私穢獻研之良烝徒石炭之魁山果擔負之筐履砥  
矢游康莊眺裕裕之春青穿離離之秋黃林無伏莽之警戶  
無烽燧之興於是尹鐸郭伋實心保障之臣繕斥埃勤驅劉  
稽刁斗慎干撤密甌脫懲冰遊塵蝟結之故崖巡蠻觸之荒  
邱孟門之扼乾河之瞰石會之燠永和五度之溝接遼控儀  
翼乎綢繆壯天地中堅銷鑰乎神州將陋表裏之誇易雄定  
之羞卑邠閣之頌狹籌邊之樓使茲山與 皇輿長鞏億萬  
禩夫烏足抗懷平關之幾閱王侯歌曰昔我 宣聖臨河還  
兮水衍風波歌且歎兮晉民思之廟於關兮鑿為轍迹曰車  
攔兮肅謁几筵整裾冠兮我生憂患食於艱兮陟彼崔嵬無  
戚顏兮猛虎戒步勞則安矣載歌 帝德平嶺岼兮險何足

云力加餐兮



星象賦

吳錫麒

余山居之夕周步林阿脫木無陰衆星森然適在頭上爰念  
天象悉符人事管智所及不韜於言爲之賦曰

遼乎哉三十五萬七千里之墟者蕩蕩其孰居體上質之不  
飾總下宙而貫諸叛赫曦以昭夜扶飛輪而迅驅馘汨颯戾  
流離參差間可械劍熒而如碁蓋可名者其星三百二十而  
微星之數又萬一千五百有奇下以象物象官象事上以錯  
絡乎報德背陽常羊蹏通之維也維帝稱尊亭毒萬有曰耀  
魄寶曰含樞紐扇巍巍於太清狀穆穆於元首祺然葦然麗  
乎中垣常朝之所以莅百官正紫宮而裁宇隘縣圍於崑崙  
閎閭閭其遼廓順斗極而啟天關碧城屹乎萬仞界十二之  
闌干沿內階以熠燿擢華蓋之團團握璣衡而出治固居其

所而不遷其在外朝是爲太微俯跨翼軫容與端闈陽耀陰  
藏授德稽疑儼華闕之雙立敞明堂之四扉掖左右以洞闢  
蕃東西而枳籬旌五帝之廣坐設屏展以障之珠煩黃而塞  
望連藻火其相徽考參率之大卞遵頽羸之上儀端冕摺珽  
聽治於斯佐之以三公夾之以四輔辨上卿之位九齊諸侯  
之等五進納言於鼎司登執法於烏府肅然而大理平蔚然  
而郎位聚魚罩駒維龍攀鳳附前有輝而後有光咸部署於  
神園亦有少民大民宗人宗正右轄則華幄常陪左轄則金  
支交映通血脈於諸王表太尊於貴姓匪劉匪霍莫能比盛  
又有言語侍從之臣密勿清禁校理祕文文昌煥發圖書畢  
陳接上台之弗蔚昭東壁之璘彬肅史官於柱下其簪佩而  
趨宸周以常陳之位翊以羽林之署森壁壘而建標環師門

而設桓虎賁夾屯積卒旁護元戈鈇鉞有警而赴後宮則鉤  
陳之外閣道凌虛龍尾炳祥后妃所居璇質窈窕軒曜敷愉  
美容翟之織纓辨服物於離瑜率三心與五噶承燕寢其密  
如別有天宿之宮解衣之室御女其姝奉命當夕下丹鳳於  
女牀兮大人占之曰吉傳說祀於高禖兮降皇儲之岐嶷復  
申之以禮防兮兩咸儆其淫泆嘉陰陽之和會兮永無讐乎  
靈匹彼夫常侍謁者珥貂飾璫翕舌附耳讒言貝昌四勢熏  
炙謀及廟堂刑餘勿邇用戒不祥若夫備游觀娛耳目則圓  
囿之屬重迴遞複榆柳成行庇宗茂族匏瓜無偶敗實猶綠  
菜果蔓生蹲鴟之沃迺有積水洋洋鬻沸中央跛鼈伏影巨  
蠚輪芒神龜巢葉金鱗躍塘隨微波而澹宕與江河其相忘  
烏則天鷄孔雀紅衿翠護鶉奔奔以結衣鶴褊褊而曳步烏

喙聳切而颺揚火鳥紛文而霞翥植者斯榮動者斯赴屬左  
右之二更準山澤而納賦其間海山縹緲象乎閩蓬通池架  
梁接鏡申虹四瀆五潢委輸無窮跨天關之嶽業日月出入  
乎其中通望渺綿周原膺膺鬢髮羅堰以洩雲灑天淵而潤雨  
維胃之腴八穀咸樹究司空之溝涂樂丈人之雞黍將登富  
於廩困用播精於臼杵何糠粃之在前慮穀飛而爲蠹夫一  
夫不耕或受之飢一女不織或受之寒伊須女之職戒在婦  
官遵彼微行爰求柔桑竭操鉤而采采葉沃若於扶筐感流  
火於七月迫授衣而已霜一布帛之淳制又何羨乎雲錦之  
爲裳蠢蠢惟人貴賤殊俗託命彼蒼綢繆纒屬合櫨營室連  
椽蓋屋雞犬相聞箕帚無譁同井而汲罔不篤睦爰有富家  
大室高明有融奴僕丰昌膺積穹隆增嬋媛以此豸閉娥婺

於房櫳紆天都之文繡調器府之絲桐雖溷廁其致飾麗美  
奢乎石崇爾乃懋遷有無廓開天市旗亭邳張列肆交峙車  
擊轂而雷填樓躡空而雲起貨別隧分連袂錯趾缺斛無愆  
斗甬相比羨帛度之章身晒屠門之津齒離珠發耀於波斯  
之船礪石效能於公輸之技狎獵紛葩替釜綺靡吏無楬槩  
哦弁以治徒觀其平道迤邐長垣陂陀旁侵傳路斜繞天阿  
或依街而立界或夾鉞而通波陽陽國而陰陰國南南河而  
北北河三泉廣其津逮八坎平其險頗則爲經爲緯時出時  
沒繞大角而亘虛梁彌寒門而還燦闕宣澤則雲雨飾威則  
霹靂蓋所以作則華京炳乾符而揚景烈也於是雞人詔且  
魚鑰開晨女史滴銅壺之漏箕伯清砥路之塵左青瑁而來  
擾右素威而効馴長離拂羽以前導元武縮甲而後蹲迺振

天桴鳴河鼓啟軍門陳葆旅髦頭被繡次乎招搖梗河迤鋒  
二矛重喬迺卒秉天槍以清候隸僕揚天楛以警囂飛九旂  
之騷殺流蘇颺乎迅颺曳雙旗之獵獵役蚩尤使不驕房駟  
騰精是襄兩照寶鉸翠華天廡所牧五車曷分結軫齊輻郎  
將引隍騎官樹靈詔造父以授綏俾王良爲之屬指車路之  
迢遙飲咸池而休若木風馳雨驟雷激雷征嘻嘻旭旭隱隱  
訇訇馭元氣之廣大按六飛而巡行遂集於青林之苑陳師  
治兵參伐森嚴紀綱肅清然後天畢張燿火起掩騰蛇追封  
豕冒日烏於罕車射天狼以弧矢八魁致禽三驅乃止曾騎  
陣之未移而前旌已返乎軍市於是陳周鼎薦犧牲清廟肅  
社稷歆嚴祠毓粹涓選休成乃登靈臺察庶徵攝提告象天  
高景清候者冠述而望氣太史書雲而珥筆沈氛浮祲司怪

是詰弭變祈禱不逢不吉然而舒慘不同威福異致天獄其  
婁大罰斯麗法網鉤鈐深牢鍵閉司非莫能彌司救莫能庇  
重者罹鈇鑕之誅小者嬰貫索之繫又或饑饉薦臻疾疫並  
至墳墓棲魂哭泣熒皆蕭蕭載鬼之車閃閃積尸之氣其虛  
其危孰階之厲若乃勤屢省發維馨上下和內外平占少微  
之朗潤招賢士而揚旌拜三壽以教敬候出丙而人丁挈天  
樽以斟酌澤下究於羣生仰陰德之普汜亮昊綽之難名猶  
必察隱宣幽周徧於十有二國轉軒出使英蕩持節朝橫船  
於漢南夕振策於益北控驛馬以載馳閱傳舍如一警樂嘉  
客之逍遙遂通道於蠻貊東甌卽序青邱內首天壘示順於  
丁零之區狗國表誠於烏丸之藪落落繩度綿綿襁負重儻  
譯於象胥辨九州之殊口咸頓頌而折威罔稽首而敢後天

門侍宴張素爲廚玉井沸華積薪燁如飲烽騰而燿火起酒  
旗卓而清醪娛旣飽飫於仁義亦沐浴於膏澤羣含精而負  
氣各顯見而彪列於是乎駘背之老翩翩然被黃髮者攜子  
若孫奉揚舄奕相與舞蹈乎泰階頌天壽之平格夫禩象冥  
緬去人甚遙然少則當名而服事大則顯面而正朝人事以  
之察天道以之昭故其順也則木彰福德金主兵強熒惑有  
禮辰和陰陽土宿播靈麗乎中央珎幽兮貝彩的爍兮珠囊  
不必表赤制而旅井兆蒼精而聚房而侶周伯駢菟昌匹含  
譽儷臧光旬始去沴而効美歸邪非雲而告祥信克念之作  
聖故蒙祉於無疆及其變也留伏不常盈縮失位流而爲衝  
滑散而爲翟沸六賊同方五色異彗雞青蛇黑雁飛虹睨山  
環若灰蓬亂如髻銀槍突圍蒼衣領隊長櫂竟天枉矢流地

斗騰亂精雲搖怪氣爽入苑而示災拔蕪河而紀異雖使木  
折於東方酒酌於晉帝而指之不能滅其妖祝之不能移其  
崇因垂戒於來茲實瞭然於紀載在昔循蜚因提之紀靡得  
而考焉已後之聖人房翼降精斗寢在抱玉衡察機金錐運  
寶詳四守定三正綜六術建五行莫不應象以釐庶政揆時  
而教農耕又有大撓剛相之倫唐昧尹皋之輩甄隲正圖援  
神定契理以言提工其人代而或凌雜米鹽抑揚渾蓋未知  
周髀之奧亥測圓穹之大是猶棘熒之耀曾未覩乎梓木龍  
燭也醯醢之守曾未涉乎虞淵湯谷也嗟下士之蟻蝨亦竊  
廁於掖垣愧鼎輔之乏器敢倉庾之濫恩慕亢池之小築卜  
幽棲以息喧摘天錢而挂杖歷果園而盤桓抱酒瓶其竟醉  
將卷舌其何言

陳登善其詞旨  
 綱對以息望斷天幾而卦卦觀象圖而聖曰游而肆其首節  
 爾其辭是則觀其之之謂也  
 歐出齋觀之定有未者乎  
 國朝文錄其詞旨  
 振家吳野以自號王其人升而如  
 而致藝林又存大謝爾爾之命也  
 寶物四官家五重縣六備  
 而善無且對之聖人  
 崇因聖無彼來志實難  
 世領東式爾爾領晉節而  
 國朝文錄卷之對屋爽人

